

#2  
3

T 2455/17


# 宋史

353

## 卷二十三

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
SEP 20 1932

ChL 2455,17





弘簡錄卷一百五十九

明刑部員外郎

和弘齋邵經邦學



皇清翰林院待講學士四世孫遠平校閱

庶官 宋六之四

王顯

子希逸

柴禹錫

趙銘

張遜

楊守一

王延德

又

程德玄

盧斌

張熙

陳從信

侯莫陳

張平

子從

王繼升

子昭

王賓

安忠

戴興

王漢忠

張凝

李重貴

劉用

耿全斌

元達

王能

魏能

陳興

王榮

楊瓊

周瑩

傅潛

張二允

郭密

傅思讓

王顯字德明開封人家世本儒遭亂失業初為殿前司小吏事

都點檢張永德太宗居藩與弭德超給事左右性謹介不好狎



未嘗足踐市肆太宗卽位遂有寵累補殿直遷軍器庫副使東  
上閣門使忿曹彬任樞密使思代其位會上念邊戍勞苦月加  
賜資謂之月頭錢彬恩所賜微彬幾餒死矣其得士心久將爲不利上  
言月頭錢彬恩所賜微彬幾餒死矣其得士心久將爲不利上  
心疑之亟命出彬而除顯宣徽南院德超宣徽北院並兼樞密  
副使未幾進顯樞密使賜以道德坊宅一區並軍戒二篇諭曰  
旣典機務無暇博覽但能熟此亦可免於面墻同列趙昌言寇  
準頗易之無何上知德超之譖復還曹彬黜顯爲隨州刺史充  
崇信軍節度觀察留後除知永興軍徙延州上疏言夏臺益部  
寇擾宜謹屯戍固城壘積芻糧遴才勇付以邊任縱有緩急備  
禦有素彼奚能爲我患哉時制沿邊犂斛不許過河西河西青  
鹽不得過界顯請爲差別輕重遠近便之移知秦州盧知翰奏

先時蕃部獻地雖朝命給還而採伐如故請量給茶綵以酬其  
直詔遣張從式同往規度顯言乃者因趙保吉脩貢邊城惟務  
安靜今無故動衆誠爲非便議遂寢咸平初入朝授橫海軍節  
度使移知鎮州曹彬卒復拜樞密使二年郊恩加檢校太師與  
副使宋湜從真宗幸大名五年改山南東道同中書門下平章  
事定州路行營都部署河北都轉運使兼知定州明年加鎮定  
高陽關三路都部署許便宜從事契丹入寇前軍過威武比時  
方積雨契丹弓弩濕緩因大破之梟名王貴將十五員獲羽林  
甲二鈕斬首二萬級手札懋諭改河陽王城節度使時議親征  
顯上言盛寒在序敵未犯塞况今繼遷未滅西鄙不寧儻北邊  
相與結援則中國之患未可量也若能選將練卒堅城繕甲亦  
足待敵必欲復燕薊舊地則脩文德養勇銳伺時之利以奉行



天罰而後可景德初徙知天雄軍上親征復陳三策已而契丹請盟德明脩貢加以賞賚許通青鹽皆其請也三年冬被病車駕上陵恨不得一拜詔中使偕尚醫療視遂卒年七十六駕已至鄭聞之遣宮苑使鄧永遷馳還護喪贈中書令顯謹凝自固頗縱部曲擾下時因攀附不數年遂正樞任獎擢之速時無比者與景德同日宣制拜使相鎮孟津景德兼大夫友在其下舉朝訝之一子希逸字仲莊幼好學聚書萬卷尤熟唐史以蔭補供奉官換秩授朝奉大夫太子中允咸平初改殿中丞直史館預脩冊府元龜加祠部員外郎希範至如京副使德超滄州涇池人初補供奉官遷酒坊使歷杭州兵馬鎮州駐泊都監論時不遷恥居同官柴禹錫下怏怏不樂語多怨望云上無執守為汝輩眩惑顯密以告上怒使滕中正就第鞫問伏辜詔奪官

職并家口配隸瓊州

柴禹錫字玄圭大名人自少質敏不凡留

學以善應對給

事晉邸太宗卽位授供奉官服勤職業改

副使遷如京使

仍掌翰林司每夜直多名訪外事遷宣徽

使與趙鎔張遜

楊守一皆以告秦王廷美陰謀乘時避會

通顯擢樞密副

使與鎔同掌機務踰年轉南院使賜第寶

時廣宮城禹錫

有別業在表識內因請以易官邸上意薄

不與宰相宋琪厚

善琪為轉請盧多遜故第上意其交通不

言王延範忠勤

禹錫從旁贊之上疑其朋比下詔切責

衛大將軍出知

滄州在任以勤政加滄州觀察使徙澶

州駐泊部署知

路州徙永興軍州乞留詔獎之再召為宣徽北院使知樞密

院事至道初罷為鎮寧軍節度使知涇州入謝上面諭故事不



弘簡錄 卷一百五十九  
過授防禦使今特加優異委卿旌節兼之重鎮禹錫流涕哽咽  
咸平中移知貝州契丹兵奄至內嚴備禦寇尋引去明年徙陝  
州未幾卒年六十二贈太尉子宗慶尚主宗亮太子中允 趙  
鎔初名容字化鈞滄州樂陵人少涉文史美書翰以刀筆委質  
晉邸勤謹被眷卽位爲改今名補東頭供奉官爲吳越國信使  
及納土又令檢校帑廩遷六宅使領羅州刺史掌翰林司轉東  
上馬門使與參政郭贄有舊請託不行撫其堂吏過失以聞贄  
見上白其事召鎔廷辨詞屈出知梓州兼兵馬部署在郡完城  
塹嚴戰具寇至境聞有備引去遷左神武大將軍本州鈐轄徙  
知廬州願留不允踰年召爲樞密都承旨同掌三班院拜宣徽  
北院使同知樞密院至知院事遣使卒京城察事至誣責書人  
韓玉抵法太宗尋知其寃後廉事不聽真宗改南院使檢校太

傅以心疾求解授壽州觀察使卒年五十五贈忠正軍節度使  
生平好佛多蓄古書畫三子忠輔西京左藏庫副使忠愿虞部  
員外郎忠厚內殿崇班

張遜博州高唐人少孤養於叔父職方員外郎幹後隨母歸魏  
仁浦自幼隸晉王帳下小心謹慎卽位補左班殿直征太原還  
遷文思副使至香藥庫使奏言嶺南平後諸蕃國入貢歲通關  
市犀象香藥充溢府庫請於京師置權易署聽商人入金帛市  
之歲可獲錢以濟經費詔允之歲中得三十萬緡後日增羨至  
五十萬雍熙二年錄其勞領媯州刺史三年轉東上閣門使數  
月卽除度支使端拱初遷鹽鐵使明年授宣徽北院使簽書樞  
密院事未幾兼副使知院事與寇準不協奏事頗相矛盾準與  
溫仲舒晚出朝門共轡同行有狂民迎馬首呼萬歲遜令所善



街使王賓奏斥準準因自辨互發其私上惡之下詔切責降遜  
右領軍衛將軍判右金吾衛仗討李順命備荆渚要害授左  
衛衛大將軍知江陵賜錢二百萬白金三千兩既至有峽路漕  
卒數千相聚謀變將以應蜀遂捕斬首惡楊承進等二十一人  
餘黨慰撫配隸州郡詔嘉之卒年五十六贈桂州觀察使子敏  
中補供奉官改秩換大理寺丞至比部郎中虛中娶宗室申國  
公女至供奉官閤門祇候孫先進士及第楊守一初名守素  
字象先河南人唐末避亂徙家宋鄭問稍通周易及左氏春秋  
事晉邸累年質直勤謹無他材術卽位補右班殿直太平興國  
中出護登州兵召還監儀鸞司遷西頭供奉以環衛多貴  
族子弟頗豪縱命置三班院令專其事考覈所有條制歲  
餘改翰林司擢東上閤門使兼樞密都承旨四方館事雍

熙中詔護遷雲朔歸附安慶兵屯于潞州三年轉內客省使端  
拱元年授宣徽北院使簽書樞密院事卒年六十四贈太尉節  
終之禮率加常數于安期國子博士孫夢得進士及第

王延德同時有二其一開封東明人曾祖定濮陽令祖璋相州  
錄事參軍父溫遭契丹亂率鄉豪捍蔽境內里人德之宣祖掌  
畿甸兵與溫厚善時延德方總角愛其謹重召置左右太宗尹  
京署爲親校專主庖膳尤被倚信卽位授御厨副使遷正使從  
征太原加尚食使賜浚儀縣壽昌坊第宅一區俄領蔚州刺史  
兼武德皇城司御筵院左藏庫凡領五印懇讓始罷左藏御厨  
又兼充親王諸宮使以舊恩每延訪外事延德謹慎不言端拱  
初轉本州團練使後當進秩特置昭宣使以寵之與社彥鈞同  
領至道二年加平州防禦使真宗改懷州永熙陵復土提點緣



路供頓咸平初出知華州俸給優厚從其請罷昭宣使幸大名  
為東京舊城都巡檢使風痺告還本郡卒年六十四贈邕州觀  
察使所至撰集近事有司膳錄皇城紀事南郊錄版築記又有  
承熙皇堂錄山陵提轄諸司記治郡復有下車奏報錄纂修實  
錄多以訪之乃上南宮事迹三卷子應昌莊宅使端州團練使  
其一大名人少給事晉郎即位補殿前承旨遷供奉官遣與  
殿前承旨白勳同使高昌國自夏州渡河經沙磧歷伊州望北  
庭萬五千里雍熙二年使還撰西州程記以獻授崇儀副使轉  
正使掌御厨出知慶州淳化三年代還命監折傳舍延德本以  
攀附得官傾險好進與宰相張齊賢善求免監倉齊賢為言之  
上怒召詰延德諱言未嘗詣宰相上疑齊賢不實齊賢亦不辨  
頓首稱罪乃出延德領懿州刺史五年提點三司磨勘憑由司

未幾拜左屯衛大將軍惟密都承旨俄授度支使真宗轉左千  
牛衛上將軍仍充使以風痺出為舒州團練使知鄆與青州坐  
市物有剩利降左武衛將軍乞骸復上將軍致仕卒年六十八  
兄延之乾德六年進士至屯田郎中

程德玄字禹錫鄭州滎澤人素善醫太宗尹京名置左右署押  
衙頗親信用事太祖大漸之夕德玄宿信陵坊夜有扣關突呼  
趣赴宮邸者德玄遽起不暇盥櫛詣晉王府方三鼓府門尚閉  
有頃內侍王繼恩馳至稱遺詔迎太宗即位德玄因從以入拜  
翰林使太平興國二年陳洪進來朝奉命迎勞渡淮暴風忽起  
眾請勿進荅曰吾將君命豈避險阻祝而行風浪遽止三年遷  
東上閤門使領代州刺史征太原為行宮使還以功改判四方  
館事領本州團練加防禦使坐市秦隴竹木責授閤門使尋遷



陝府西南轉運使車駕幸魏府命總御營四面巡檢掌給諸軍  
資糧言者論其交遊太盛出爲崇信軍行軍司馬踰年復拜慈  
州刺史移知環州時西鄙酋豪相繼內附詔付以空名告救百  
道得便宜補授淳化三年復改本州團練使知邠州討李順移  
知鳳州兼領鳳成階文等州駐泊兵馬事徙慶州咸平中入朝  
真宗命坐撫勞訪以邊事出知并州兼并代副都部署移鎮州  
代歸卒年六十五贈鄭州防禦使兄德元同仕王府至內酒坊  
副使子賁祥符五年進士累遷太常博士孫繼宗東頭供奉官  
閣門祇候繼忠內殿崇班  
盧斌開封人初以筆札事晉邸太宗卽位補殿直雍熙中領兵  
屯霸州隨曹彬北征旣克涿州令斌以萬人戍守會食盡大兵  
將還斌言涿州地在北境外無援兵內無資糧終不能守彬以

爲然乃令斌擁城中老幼並狼山南還易州斌又言還師之日  
遼人必乘便剽襲宜爲之備彬不能從諸將果以失律坐譴  
聞斌嘗建議詔釋不問除霸州緣邊巡檢使端拱中改永興軍  
華州巡檢大賊侯和尚劉渥劫興平櫟陽斌率兵襲之且追且  
鬪薄南山渡渭水直抵鳳翔擒斬略盡以勞改供奉官閣門祇  
候賜白金緡錢衣帶尋爲梓遂十二州都巡檢使太宗諭以川  
陝人情易搖許便宜從事淳化二年賊任誘等寇昌合州斌率  
兵頓昌州南午鬪山傾知賊在龍水鎮冒大雨馳四十里遂斬  
誘等賊衆悉平三年又追降富順監蠻酋甫羌一阿奴綱諭以  
朝旨歃血爲盟而遣之俄本監及榮戎資州賊復鈔鄉邑斌擒  
三百人部送闕下四年賊王蓋復起斌又擊滅之遷內殿崇班  
討李順率兵六百抵成都連月戰鬪殺賊數萬人明年成都不



守斌復還梓州集十州兵赴援知州張雍委以監護之任會汪水溢毀子城諭州民集畚鍤自城西掘大濠決水注之負土塞南北門爲固守計賊二十萬傅城下城中兵纔三千斌感厲士伍乘間突出與戰三十餘合賊稍却會王繼恩令石知顯率兵來援斌出東門迎勞賊不戰而潰乘勝追斬及納降至二萬餘賊復圍閬州斌領千兵赴之破五千人圍遂解又至蓬州老鴉山擊敗賊衆三千抵城下賊復大集斬三千級蓬州平傅詔安撫蓬閬渠達四州擢西京作坊使領成州刺史斌在川陝六年以孤軍禦寇累立戰功旣而賊黨集梓綿漢三州境上斌復往平之代還太宗親加勞問拜東上閣門使檢校左僕射加食邑三百戶賜白金袍笏金帶上言葭萌路直通利州若寇焚棧道劔門之險不足爲固請建立砦柵從之尋轉銀夏兵馬鈐轄會

五路討李繼遷斌求對言羌人馬騎兵悍往來無定不若堅保靈州多積芻糧敵至會兵首尾擊之庶外無杜費內不失固圉之策不從改授靈環鈐轄領兵二萬爲先鋒斌不俟詔自環州橐駝路往與諸將失期不見賊而還徙屯寧州以疾召歸勾當軍頭引見司卒年五十子文質殿中丞

張煦字輔暘開封人開寶末補晉府牙職太宗尹京管事左右雍熙二年自陳命爲殿前承旨遷殿直監歙州軍凶人黃行達弟坐法抵死誣州將故入詔煦與宣州通判姚鉉同鞫卽日決遣還擢供奉官歷鎮定邢趙都巡檢使契丹剽境上煦率所部擊走之葛霸周瑩李繼宣咸稱其材幹詔書嘉獎代還拜供備庫副使權知環州數月改岢嵐軍使移知保安軍討王均爲綿漢劔門都巡檢使主攻成都東砦焚其郭及樓堞均突圍而遁



事平就遷正使徙益州都監與知州宋大初同提總本路諸軍  
事有戰艦卒謀亂煦捕斬之夏人寇邊改四路都鈐轄兼安撫  
都監累躡寇營掩殺甚衆詔獎之命監西路行營與王超秦翰  
共援靈武至鎮戎聞城已陷乃引軍還又與張凝出白豹鎮至  
柔遠川夏人邀戰會慶州監軍張綸擊殺甚衆凝按部道歸爲  
敵所邀煦自慶州赴之射殺其大將景德初命副曹利用爲廣  
東西路安撫使平宜州陳進改如京使知懷州東封遷文思使  
知曹州權河陽鈐轄會江淮災復爲江南西路安撫都監累遷  
西上閤門使徙并代鈐轄以老疾求近郡知磁州卒年七十三  
煦能明術數善相宅時稱其妙

陳從信字思齊亳州永城人素以恭謹精心計事晉邸官累右  
知客押衙令典王宮財用事無大小悉以諮焉闕寶三年三司

言倉儲月給止及明年二月請分屯諸軍盡率民船以資江  
漕運太祖大怒三司使楚昭輔懼詣晉府求寬王召從信問計  
對曰從信嘗遊楚泗知糧運之患良由舟人廩食日歷郡縣勤  
給是以遲滯若計往復日期併與支給可以責其程限又楚泗  
運米至京復輦入倉宜宿備運卒卽時出納如此每運可減數  
十日舊制一歲三運若去淹留之虛日計歲可增加一運矣今  
三司欲籍民舟不許則無以責辦盡許之則至冬京師薪炭殆  
絕不若募舟之堅者任漕糧其損敗者載薪炭庶幾公私俱濟  
又市米所以騰貴者因官價賤買人失利不至居商亦匿而不  
糴故米益貴宜聽民自便卽四方奔湊者多價自賤矣明日具  
奏可之事果成集太宗卽位遷東上閤門使充樞密都承旨會  
八作副使綦廷珪以疾在告假滿不落籍愈日不朝叅從信坐



責授開府使閤門祇候太平興國二年改左衛將軍復爲承旨  
征并汾充大同副部署因秦王事罷明年分三司爲三部授後  
信度支使賜浚儀寶積坊第加右衛大將軍卒年七十三贈太  
尉生平好方術有李八百者自言八百歲從信事之甚謹冀傳  
其術竟無所得又成都人侯莫陳利用幼得幻術賣藥京師專  
言黃白事惑人從信薦之太宗召見試其術頗驗授殿直遷崇  
儀副使累遷至鄭州團練使前後賜與甚渥依附者頗獲進也  
日漸橫恣居處服玩僭擬乘輿人畏之不敢言宰相趙普以圖  
上遣近臣案實上猶欲庇之普固請除名配商州籍其家詔復  
還之普恐其復用令殿中丞竇誣上書言利用昔監鄭州管南  
向坐以接京使犀玉帶悉用紅黃羅袋澶州黃河清川爲詩題  
試舉人判試狀言甚不遜京西運副宋沆又進其家所獲書數

紙言皆指斥乘輿上始大怒令中使齎殺之

張平青州臨朐人弱冠寓單州依刺史羅金山署馬步都虞候  
太宗尹京置邸中及秦王領郡署爲親吏有譖匿府中錢物者  
王白鞠之無狀因不喜遣去太宗憐其非罪以屬徐帥高繼冲  
署爲鎮將卽位名補右班殿直監市秦隴木更立制度建都務  
計水陸之費以春秋二時聯巨筏自涓達河歷砥柱以集于京  
期歲之間良材山積上嘉其功遷供奉官監陽平都木務兼造  
船塢舊因河流湍悍凡調三戶共守一舟歲役數千戶至平穿  
池引水繫舟其中不復調民有寇陽拔萃者往來關輔間積年  
爲患朝命內侍督數州兵討之不克平遣人以好辭說降改崇  
儀副使仍領務凡九年計省官錢八十萬緡雍熙初召還同知  
三班院事遷如京使連擢西上閤門客省鹽鐵三使以陝西轉



運李安發其舊事憂恚成疾而卒年六十三贈右千牛衛上將軍平寬厚不念舊惡性好書史微時盡日耽玩及貴聚書數千卷嘗嘆秦王事始雖命蹇後未必不為福已而果然子從式亦事晉邸累官文思使從吉蔭補殿直轉供奉官知宜州屢破溪蠻陳堯叟上其狀遷內殿崇班閤門祗候在任八年代還為如京副使咸平中知環州嘗與宋沆率兵襲西夏小訶部署張凝表其專責授崇班俄知澧州復舊秩命副曹利用討宜州陳進斬首六十級改莊宅副使未還卒年四十九

王繼升冀州阜城人性純質謹愿自太宗居藩信任之補供奉官累遷軍器庫副使陳洪進納土以為泉州兵馬都監會游洋洞民萬餘叛攻城繼升率精騎夜擊破之擒其魁械送闕下餘黨悉平召遷軍器庫使領順州刺史知諸道陸路發運事在

熙四年併水陸發運為一司命掌其事號為稱職遷右神武將軍端拱初領本州團練使卒年六十四贈洋州觀察使子昭遠形質魁偉色全黑人呼為王鐵山有膂力善騎射少時遇里中祀神眾方博昭遠適至禱曰他日儻有節鉞六商皆赤一擲果然遊京師與弟昭懿皆事晉邸特被親遇即位補殿前指揮使遷都知征太原先登為流矢所中血漬甲縷戰益急劉繼元降命守城門籍兵仗從征范陽又多所擒獲超散員指揮使領寰州刺史改馬步軍都軍頭命乘傳鎮定高陽關募兵以備契丹尋為冀州駐泊都監授澤州團練使洛州都部署太宗屢稱其能嘗草書執扇作詩賜諸將於昭遠尤加賞遇端拱初召為殿前都虞候領勤州防禦使二年領沙州觀察使再為并代副都部署至道中為靈州都部署護二十五州芻粟達靈武繼遷



不敢犯真宗徙定州行營未幾拜保靜軍節度使充天雄軍都  
部署知府事咸平二年移知河陽卒年五十六贈太尉諡惠和  
昭遠頗知書性吝嗇所至無善政 昭懿至捧日都虞候昭遜  
西京作坊使孫懷普九歲侍太宗左右至西京左藏庫使平州  
刺史懷一供備庫副使懷正內殿承制懷英內殿崇班

尹憲晉陽人開寶中事太宗藩邸卽位擢殿直充延州保安軍  
使改供奉官太平興國四年護府州屯兵與鄜州三族會攻嵐  
州破敵千餘擒僞知州馬延忠拔緣河諸砦以功轉西京作坊  
副使入朔州界破寧武軍殺其軍使獲人馬噐甲甚衆轉供備  
庫使護夏州兵殺戮三汭醜奴莊岌伽羅臧葉十四族及誘其  
渠帥屢降詔書褒美雍熙初就知夏州攻破地斤澤李繼遷遁  
走俘獲四百餘帳憲奏請抽移諸帳於所部別置驍兵號曰平

砦以備用詔從之俄殺蘆關及南山野狸數族諸族遂擾代還  
爲洪州巡檢未幾命護莫州屯兵三年詔知瀛州兼兵馬鈐轄  
領富州刺史遷東土閣門使端拱二年歷滄邢二州皆兼鈐轄  
淳化初爲四方館使連護鎮定屯兵改知貝州移高陽關鈐轄  
五年知定州與部署王榮不協榮毆憲仕地因邑邑致疾卒年  
六十三

王賓許田人小心謹愿年十餘事宜祖左右及長善騎射太祖  
命署晉府右職太平興國初補東頭供奉官監亳州軍時監軍  
不許挈家賓妻妬悍嘗擅至亳賓具白上太宗召其妻杖之至  
死遷儀鸞副使領內酒坊從征太原范陽與劉遇攻城東面  
駕北巡佐王仁贍爲大內副部署改洛苑使會汴漕壅滯軍食  
不給詔別置水陸發運兩司以賓有心計命與許昌裔同掌其



事凡四年儲積增羨號為稱職加領濱州刺史改右神武將軍  
張遜薦護黎陽軍兼領黃御兩河發運進本州團練使黎陽當  
舟車交會禁兵常屯萬餘賓請建通利軍就命知軍事規起公  
署郵館供帳咸具加本軍大將軍兼河北水陸轉運使貝州兵  
屯無壁壘分寓邸肆賓選隙地築舍千二百區以處之優詔褒  
美召入為右羽林衛大將軍判左金吾兼六軍諸衛儀仗事淳  
化四年出知揚州兼淮南發運使徙為通許鎮都監卒年七十  
七賻贈加等凡事二祖一宗殆六十年最為勤舊恩寵尤異前  
後賜賚數千萬俱奉釋氏

安忠洛陽人祖叔于仕晉任方鎮以太子太師致仕父延韜左  
清道率府率忠形質魁岸不知書纔通姓名而已事晉邸之二  
十年卽位授東頭供奉官弓箭庫副使西京作坊使掌翰林圖

內衣庫提點醫官院護屯兵于雄州當拒馬河收後忠分砦兵  
布列緣邊以備遊騎徙威武軍隸鎮定路之左廂又鑿河葺城  
壁以勞擢東上閣門使與大將李繼隆田重進追契丹兵于祁  
州北詔書獎飭端拱初移護高陽關屯兵契丹侵鎮定忠與崔  
翰拒之傳潛陣于瀛州忠當城之西面三年徙知壽州移貝州  
捕獲劇賊十二人淳化四年改左龍武軍大將軍忠泣言諸衛  
將軍列在外朝不得近左右願復舊職上笑曰環列之尹古官  
也大將軍三品汝何不知因從其請復閣門使充淮南諸州兵  
馬鈐轄以病歸至泗州卒年六十四錄其孫惟慶為殿直  
戴興雍丘人父延正兄進皆力田興自幼以勇力聞及長身長  
七尺美髭髯眉目如畫詣晉邸求見奇之留帳下卽位補御馬  
左直遷直長轉御龍直副指揮使征太原先登中流矢補弓箭



直都虞候父亦授諸衛將軍進天武軍使興領嚴州刺史改天  
武左廂都指揮勝州團練使雍熙三年爲侍衛步軍都虞候雲  
州防禦使契丹擾邊命興屯瀋州以備非常改本州觀察使充  
天雄軍副都部署端拱初遷步軍都指揮使領鎮武軍節度使  
賜襲衣金帶鞍馬歷瀋州都部署殿前副都指揮使出帥鎮定  
二州時盜賊羣起五巡檢兵討之不克興陰勸所部潛出擊之  
擒戮殆盡未幾徙高陽關遷殿前都指揮使改節定國軍賜白  
金歲給錢七百萬淳化五年又改定武軍加給錢千萬西北未  
平徙夏州路行營都部署知州事從五路討李繼遷深入不見  
賊聞帝崩急赴國哀坐擅離所部左遷領軍衛上將軍咸平初  
兼判左金吾街仗出知京兆府卒贈太尉遣中使護喪歸葬錄  
其子永和永豐

王漢忠字希傑彭城人少豪蕩有膂力形質魁岸善騎射高繼  
冲召不往見太宗于晉邸奇其材力留置左右卽位補殿前  
揮使累遷內殿直都知征太原先登流矢中眸戰益急上壯之  
遷東西班指揮使太原降漢忠以所部安撫城中師還改殿前  
左班三遷右班都虞候領涿州刺史雍熙中改馬步軍都軍頭  
端拱初出爲賓州團練使歷冀貝二州部署徙天雄軍二年入  
爲侍衛馬軍都虞候領洮州觀察使高陽關副都部署合諸軍  
擊敗契丹斬馘甚衆淳化初徙定州五年遷殿前都虞候真宗  
自中山召歸俄復出爲高陽關都部署領威塞軍節度使咸平  
三年移涇原環慶兩路兼安撫使遷侍衛馬軍都指揮鎮定高  
陽關三路都排陣使契丹掠中山幸諸將陣于野契丹遁追斬  
甚衆獲其貴將加殿前副都指揮使改節保靜軍五年會罷西



面經略命爲邠寧環慶兩路都部署委以分道控制李允正宋  
沈兵二萬五千人坐違詔無功責左屯衛上將軍出知襄州未  
上道暴卒贈太尉錄其子內殿崇班從吉爲閤門祇候從政從  
益爲左右侍禁漢忠性剛果輕財樂施有識略好讀書頗能詩  
喜儒士待賓佐有禮每行師號令甚肅犯者無所寬貸故所部  
無盜

張凝滄州無棣人少儻武力自任與鄉人角勝負約築土百  
步射之凝一發洞過矢激十許步抵大樹而止觀者歎服節帥  
張美壯之太宗居藩聞其名以隸親衛卽位補殿前指揮使稍  
遷散員都虞候淳化初以材幹授洛苑使領繡州刺史賜襲衣  
金帶每頒賚必異等出爲天雄駐泊都監移貝州改高陽關行  
營鈐轄真宗加莊宅使遷北作坊使咸平初與契丹戰挺身陷

敵子昭遠年十六單騎疾呼突入陣中挾凝以出左右披靡不  
敢動明年遼兵大至凝與范廷召分據莫州東斷其歸路敵宵  
遁縱兵擊奪盡還所掠資口徙鎮定高陽關前陣鈐轄遷趙州  
刺史四年召還爲邠寧環慶靈州路副部署兼安撫使時斥堠  
數擾運使劉綜懼飛輓不給問計於凝凝曰今當深入因敵資  
糧不足慮也乃自白豹鎮率兵入敵境生擒賊將燒蕩三百餘  
帳取芻糧八萬斛斬首五千餘獲牛馬器甲二萬降九百餘人  
因襲破慶州蕃族胡家門等又八州原分水嶺柔遠鎮熟戶與  
生羌錯居頗爲誘脅凝引兵降峇都等百七十餘族合四千戶  
邊境獲安就加寧州團練使景德初遷本州防禦使代楊嗣爲  
定州路行營副部署徙保州駐泊兼北面安撫使時總帥王超  
以大兵頓中山議擇凝與魏能田敏楊延昭分握精騎深入幽



易以牽敵勢。超請悉隸所部。上不許。曰：朝廷本設奇兵，撓敵心腹。若復取裁，大將無以責效。魏能逗撓不前，衆憤皆責讓。能凝獨無言。徐曰：能麤材，剛愎可優容之。若令心不自安，非計也。上嘉其有識。車駕幸澶淵，凝率衆抵易州。爲緣邊安撫使，提兵躡契丹。後敵不敢肆，復改高陽關部署。明年就加殿前都虞候。卒凝忠勇，自負好功名，累任西北善訓士卒，繕完器仗。前後賞賜多以犒師。京師無居第，上悼惜之，贈彰德軍節度遣中使護喪。官給葬事，厚卹其家。昭遠擢左班殿直，西上閤門副使出知定瀛雄三州。歷官至左龍武衛大將軍，卒。贈應州觀察使。李重貴，孟州河陽人，姿狀雄偉，善射事壽帥王審琦。頗見親信。妻以甥女，補合流鎮將。謀知羣盜潛謀入劫，卽夜築柵，課民習射。盜聞潰去。太宗居藩，知其勇幹，召隸帳下。卽位，補殿前指揮。

使累遷龍衛左第四軍都指揮使，領河州刺史。改捧日右廂，蠻州團練使。至道二年，爲麟府濁輪砦都部署，賜以御劔。得對便殿，因言：繼遷居沙磧，逐水草，畜牧無定，便利則進，不利則走。今聞五路齊出，彼必遠遁。欲追則人馬乏食，將守則地無堅壘。臣輩何顏以見陛下！旣而諸將果無功，還改并代副都部署。真宗加本州防禦使，徙高陽關。行營咸平二年，契丹南侵，議屯兵楊疇。先鋒張凝遇敵，重貴率策應兵酣戰，全軍而還。康保裔已覆重貴，復引兵赴援。腹背受敵，自申至寅，力戰退敵。時諸將頗失部分，重貴獨以全軍還。屯上功，進階與食邑。嘆曰：大將陷沒，吾曹何面目復計功耶！徙知貝州。召見勞問，改滄州。駐泊副都部署兼知州事。連爲邢州、天雄軍二部署。又知冀州。幸澶淵，召還爲大內都部署。明年出知鄭州。以疾授左武衛大將軍。潘州防



禦使致仕卒

劉用相州人祖萬進河中馬步軍都指揮使父守忠左驍衛大將軍用曉音律善騎射事晉邸即位補軍職累遷散都頭都虞候端拱初為馬步軍副都軍頭領涼州刺史鎮定招安使轉捧日都指揮使討李順為西路行營鈐轄賊平改刺祈州至道初為河西烏白池都鈐轄斬首千餘級奪馬五百疋改高陽關并州副都部署真宗加本州團練使咸平中徙貝與瀛州時烽堠數驚用建議益邊兵俟契丹南牧即率驍銳出東路以牽制其勢因圖上地形上召宰相閱視可其奏且令轉運使於保州威武靜戎順安軍預備資糧六年命將三路出師用與劉漢凝田思明領兵五千由東路會石普孫全照犄角以禦契丹未幾換鎮州景德初移邢州車駕北征以城守勞進爵邑歷知齊陳潞

三州祥符二年卒

耿全斌冀州信都人懷順軍校顯子少豐偉善左右射顯携謁陳搏許以藩屏值顯戍西蜀全斌往省乘舟沂江大風失纜漂七十餘里舟忽泊岸人頗異之游京師以材武自薦得名試遂隸晉邸即位補東班承旨稍遷驍猛副兵馬從征太原還遇契丹于蒲陰追擊至徐河因據水口要告遷補日騎副兵馬使歷雲騎軍使屯瀛州與契丹戰所乘馬連中流矢死凡三易馬戰益力敵引去端拱初又擊敗蕃部于宥州累進殿前左班馬步軍都軍頭在軍中多稱其能真宗嘗召問邊事口陳利害稱旨因謂輔臣曰觀其詞氣若有志操宜試之邊郡遂拜雄州刺史知深州徙石隰部署以備河西繼遷死率兵入伏落關誘降蕃部數千俄知安肅軍繪山川險易為圖以獻契丹來侵自山北



抵河滸全斌分率精銳遣子從政焚橋砦擊走之改冀州刺史  
高陽關鈐轄擢從政爲侍禁寄班祇候封泰山以爲濮州鈐轄  
還京卒

元達初名守旻洛州雞澤人身長八尺負膂力善射家業農不  
任作苦委耒耜去之任俠縱酒常醉見道旁槐樹拔劔斬之樹  
立斷達私喜曰吾聞李將軍射石飲羽今樹爲我斷豈神助耶  
適以戶籍調役達當送徒闕下行數舍悉縱之郡遣追捕至達  
援弓引滿追者不敢近由是亡命求見晉邸得隸帳下侍太宗  
習射園亭達射連中上喜更今名位補御龍直隊長雍熙初  
遷媯州刺史領本州團練使端拱二年擢侍衛步軍都虞候領  
幽州刺史歷北面行營都部署入爲京城巡檢卒年四十二贈  
昭化軍節度使達雖奮自草野歷職戎署至交士夫能折節盡

禮人以是稱之

王能定陶人初事州將袁彥名置晉邸太宗卽位補內殿直歷  
殿前左右班指揮使散員都虞候領潘州刺史兼御前忠佐馬  
步軍都軍頭咸平初出爲濟州團

知靜戎軍建議決鮑河  
漕以實塞下開方田盡

斷長城口北注雄州塘水以限戎  
宗語宰相詢軍校勤勇宣

靜戎順安之境契丹來寇擊走之

力公家者委以方面能與魏能陳興張禹班皆有聲于時擢本  
州防禦使出爲邢洛路都部署改鎮定高陽關三路行營押策  
先鋒護城邠州躬率丁夫旦暮不離役所宴犒周洽手詔褒飭  
徙天雄軍改定州祥符二年合鎮定兩路爲一命能領之明年  
召拜侍衛步軍副都指揮使領曹州觀察使祀汾陰爲京城巡  
檢兼殿前司禮成加振武軍節度使復爲鎮定副都部署兼知



定州八年入覲特令用藩臣禮賜宴長春殿舊例諸帥不得預坐因能故從有司奏併令預坐著以爲例俄還屯所改節靜江軍天禧元年轉都指揮使領保靜軍代還入見賜宴以足疾免舞蹈特與醫療二年罷軍政移彰信軍近其鄉里以寵異之卒年七十八贈太尉錄其子守信等官

魏能鄆人少應募隸雲騎軍後補日騎左射隸殿前班七遷散員左班都知太宗知其材勇由是進用端拱二年加御前忠佐馬軍副都頭歷殿前左班都虞候領溪州刺史轉馬步軍都軍頭咸平三年真拜黃州刺史爲鎮定高陽關前陣鈐轄契丹入寇與諸將合戰大敗其衆斬首二萬殪統軍鐵林公奪甲馬兵械甚衆改領鄭州團練使契丹復入率州軍逆戰于南關門遣其子政與都監劉知訓間道絕敵戰數十合敵退薄西山破走

之獲器甲無算又偵知謀入鈔發兵逆擊生擒酋帥殄滅殆盡六年改知威武軍士請闕乞留詔嘉之能建言邊境戍卒逃逸者沒其妻子爲奴上慮嚴迫聽緩期自新違者坐以法徙莫州路部署與石晉兵順安軍西營出浚河以拒寇詔楊延昭田敏倚角爲備景初復與白守信破敵長城口賜錦袍金帶契丹統軍撻覽攻武順安軍能與普破其前鋒拜防禦使轉寧邊軍部署使部兵伺敵動止值邊人百餘掠居民樹蕃僭爲帥能與田敏楊合兵設伏擒之會詔能領偏師分道牽制契丹能畏悞不前不戢所部多俘奪人馬朝議謂不可專任乃命綦政敏爲鈐明年師還大名與孫全照爭先入城全照密疏能退縮失期師旋不整狀責授右羽林將軍出監鞏縣軍尋改右驍衛大軍號州都監復康州團練使卒錄其



子正閣門祇候靖三班奉職

陳興澶州衛南人開寶中應募為卒隸御龍右直常從太宗征河東幸幽州特被賞賜累遷天武軍指揮使端拱中改御前忠佐步軍副都軍頭王超奏隨軍遣戍汾州明年李繼隆命權知夏州尋還屯所受詔提轄河東緣邊城池器甲芻糧至道初繼隆薦其材幹召補御龍弩直都虞候咸平初為馬軍都頭領蒙州刺史三年真授憲州刺史知霸州徙滄州副都部署移石隰駐泊會城綏州詔興與錢若水往視利害事具若水傳又徙涇原儀渭鎮戎軍部署上言鎮戎軍去渭州瓦亭砦七十餘里中有二堡請留戍兵三百從之俄與曹瑋秦翰領兵掩擊蕃寇章埋族帳斬二百餘級生擒三百餘人奪鎧甲牛羊駝馬詔書嘉獎賜金帶錦袍器幣繼遷所部康如族恃險與眾尤桀黠難制

往歲鈔劫靈州芻糧興復與翰等合眾進討窮其巢穴俘老幼獲器畜甚眾盡焚掘其窖藏詔復褒之仍加賜賚景德三年遷本州團練使知徐州雖起行伍有武略所至頗著聲績軍校之中興材為最祥符初召為龍神衛四廂都指揮使領登州防禦使出為邠寧環慶路副都部署兼知邠州坐擅釋劫盜罷軍職改徐州防禦使知懷州卒

王榮定州人父洪嗣仕晉為本州十縣遊奕使榮少有膂力為馬仁瑀廝役嘗引強射屋棟矢入數寸人目為王硬弓太宗居藩隸左右即位補殿前指揮使遷本班都知員僚直都虞候盜發棣州往擒之加御前忠佐馬步軍都軍頭領懿州刺史坐受秦王宴勞出為濮州馬軍教練使復坐與秦王親吏言我不久當得節帥削籍流海島雍熙中召復前官累遷龍衛都指揮羅



州團練使率兵戍遂城擊敗邊騎擒千餘人入拜侍衛馬軍都虞候峰州觀察使出爲定州行營都部署榮所爲麤率不中理侵官地蒔蔬吝公錢不以勞將士母老不迎養供給帝怒之詔加督責左授右驍衛大將軍真宗命領獎州刺史濱州防禦使遷涇原儀渭駐泊部署車駕北征召爲貝蕘行營都部署師旋復還涇原榮疎於智略援送靈武芻糧至積石不嚴斥夜爲蕃寇所劫營部亂亡殆盡坐法恕死除名配均州起爲左衛將軍景德初權判左金吾街仗觀兵澶淵命爲黃河南岸都巡檢二年遷左神武軍大將軍領恩州刺史郊祀改左龍武軍達州團練使祥符中遷昌州防禦使朝太清宮命爲河南駐泊都監卒年七十官其一子

楊瓊汾州西河人幼事馮繼業以材勇稱太宗召置帳下卽位

隸御龍直三遷神勇指揮使從征太原以勞補御龍直指揮使雍熙初改弩直都虞候兼御前忠佐馬步都軍頭領顯州刺史李順叛命爲夔峽擒賊招安使領兵自峽上與賊遇累戰抵渝合偕尹元裴莊分路進討克資普二州及雲安軍斬首數千級詔書嘉獎卽軍中真拜單州刺史至道初召還徙知霸州兼鈐轄未幾改防禦使靈慶路副都部署河外都巡檢使賊累寇疆悍禦有功又導黃河溉民田數千頃敗賊於合河鎮北獲人畜亾算賊騎五百掠城下復擊破之追北三十里並賜詔嘉獎咸平二年兼涇原儀渭邠寧環慶清遠靈州六路副都部署尋徙鎮定高陽關押策先鋒屯定州明年副王超於鎮州徙定州四年召還以鄜州觀察使充靈環十州軍副都部署兼安撫副使敵圍清遠砦瓊將出兵鈐轄馬守規張繼能止之命副部署潘



璘都監劉文質率兵六千往赴逗遛不進敵攻破南門城遂陷  
事聞驛召繫獄罪當死詔貸之削官流崖州繼能守規同坐籍  
其家明年移道州景德初起爲右軍衛將軍分司西京累遷左  
領軍衛大將軍領賀州團練使知兗州卒年六十七錄其子舜  
臣爲奉職舜賓內殿崇班閤門祇候

周瑩瀛州景城人父景家富于財好交結歷事唐漢周習水利  
嘗浚汴口導鄭州郭西水入中牟渠脩滑州河堤官至右領軍  
衛上將軍太宗居潛瑩得給事左右卽位補殿直領武騎卒數  
百巡警泉與福州捕劇賊千餘遷供奉官節度孫永祐轉運楊  
緘皆薦之命使綏銀州按邊事還奏稱旨擢鞍轡庫副使雍熙  
二年爲杭睦五州都巡檢使擒妖僧紹倫戮三百餘人時以爲  
酷代還累遷監鎮定高陽關加判四方館事與郝守濬護塞宋

州決河歷知天雄軍真定府就遷引進使至道二年詔詣李繼  
隆軍前授以機事還拜客省使簽書樞密院諸房公事真宗加  
領富州刺史封其母武功郡太夫人咸平二年從征河朔爲駕  
前馬步都部署三年遷南院使知樞密院事時議推瑩練達軍  
事拜永清軍節度使詔益兵八千分屯環慶涇原以禦繼遷景  
德初車駕北巡爲駕前東西貝冀路都部署明年改知陝州徙  
永興軍移邠州西夏內屬詔省戍兵瑩復乞留詔責其庸懦代  
以曹瑋徙澶州東封車駕所經特賜襲衣金帶噐帛祥符初改  
知天平軍又爲鎮定都部署兼知定州被病卒年六十六贈侍  
中諡元惠瑩鮮韜略雖居禁近勲業無大過人子普崇儀副使  
顯內殿承制孫永昌永吉殿直

傅潛冀州衡水人少事州將張延翰太宗召置藩邸卽位隸殿



前左班三遷東西班指揮使從征范陽先至涿州與契丹戰生擒五百餘人上嘉歎之師旋擢內殿直都處候累遷雲州防禦使雍熙二年北征爲幽州行營前軍馬步指揮使例責右領軍衛大將軍明年起復舊官端拱初累領昭化武成二軍節度使出爲高陽關都部署真宗改領忠武軍節度咸平二年復爲鎮定高陽關三路行營都部署潛本以倖進無方略性復畏懦時契丹大入潛麾下步騎八萬皆自置鐵槌鐵椎爭欲奮擊將校以請潛不許但閉門自守契丹遂破狼山砦悉銳攻畧邊軍游騎出邢洛鎮定路絕朝廷遣使督潛出師潛曰賊勢如此與之角適挫吾銳范廷召桑贊秦翰屢促會兵合擊皆不聽鈴轄張昭允力勸不得已分騎八千步二千付廷召等於高陽關逆擊方血戰徵援兵不至致康保裔敗死車駕將親征命石保

吉上官正白大名領前軍赴鎮定與潛會潛又遲遲不發諸將請益兵不與勝又輒抑不聞上駐大名聞之大怒遣高瓊往代召至行在下臺獄命錢若水同按議當行法命貸死削奪官爵并家屬長流房州籍其貲產五年會赦徙汝州景德初起爲本州團練副使改左千牛衛上將軍分司西京祥符四年車駕西巡從還京遷左監門大將軍還其它久之判左金吾街仗卒張昭允字仲孚衛州人以父秉蔭試大理評事潘美妻以女奏換右班殿直遷通事舍人端拱初爲雄州監軍契丹掠境上與田仁朗選銳卒襲其帳敗走之進西上閣門副使提總左右藏真宗以章懷后故頗被親信授以行營馬步都鈴轄與潛同坐削長流道州景德二年起爲楚州團練副使改右神武將軍卒爲人喜筆札習騎射曉音律子正中居中



郭密貝州經城人軀幹雄偉膂力絕人幼孤隨母改適冒姓王氏馬仁踴薦隸晉王帳下卽位補指揮使復姓郭氏淳化間凡八遷移貝州駐泊兵馬部署會夏人寇邊以有武略擢領安州觀察使充靈州兵馬都部署訓練士卒號令嚴肅夏人畏服邊境寧謐卒年五十八贈保順軍節度使傅思讓冀州信都人少無賴勇力善騎射補晉邸親事都校卽位補衛士直長累遷平州刺史破契丹兵于唐興口端拱中四遷容州觀察使知莫州移隴州所爲多不法上命殿中丞林特同判州事卒年七十四贈保順軍節度使李斌青州人晉邸聞其狀貌魁偉召署左右卽位補御龍直副指揮使太平興國中以天武指揮使領鄭州刺史坐受秦王饋貶曹州都校雍熙三年遷營州刺史四年領溪州團練使斌勤於政卑人服其清慎轉運陳緯以狀境上其善狀詔書褒美卒年六十

聞至道初拜桂州觀察使仍判洛州徙滄州及代吏民不忍其



弘簡錄卷一百六十五

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之五

張耆 孫叔 王繼英 蔚昭敏 王守俊等 高化 楊崇勳

夏守恩 弟守贊 謝德權 父文節 安後 趙振 子珣 孟元 劉謙

白守信 趙滋 范格 馬懷德 和斌 子詵

張耆先名旻字元弼開封人年十一給事真宗藩邸即位授西

頭供奉官擢供備庫副使帶御器械累以邊功遷南作坊使昭

州刺史天雄軍兵馬鈐轄連徙鎮定州行營契丹侵望都耆從

諸將間道往援與戰身被數創斬其梟將還言天道利先舉者



請帝大舉討之輔臣以爲不可會明年復入帝悔不用其策遷  
昭州團練使命守澶州充駕前東西面排陣使者上邊事十餘  
條多論兵貴持重及所以取勝者事平爲曹州趙諫所告貶供  
備庫使潞州都監久之事稍辨復官管勾皇城司帝以耆素歷  
河東邊事召見宣和閣問地里險易狀因言雲應蔚朔四郡間  
敵數遣人假以文移瞰虛實識道路宜密諭并代自今由雲應  
蔚至者從大石谷入由朔至者從土壘入餘間道皆塞之以示  
險景德罷兵與曹璨李神祐岑保正闕軍籍汰罷癯東封轉絳  
州防禦殿前都虞候常諫玉清昭應宮以爲殫竭財力非所以  
承天意遷相州觀察使連徙武寧鎮安淮南節度拜同中書門  
下平章事判陳與壽州天聖三年召爲樞密使進兼侍中封鄧  
徐二國公以太子太師致仕李贈太師諡榮僖耆重密有知數

幼時命授以論語左氏春秋又賜宸戒二十條及聖政記冊府  
元龜故頗知傳記及術數之學所言象緯輒中章獻太后微時  
嘗寓其家事之甚謹故臨朝寵遇最厚賜第尚書省西凡七百  
楹安佚富盛踰四十年家居爲曲園積百貨其中與羣婢相質  
易病者親爲診切雖藥費不令外僨所歷藩鎮頗以爲擾子二  
十四御之甚嚴日一見令就外舍得一守貝州坐誅誠一客省  
使樞密都承旨希一引進使歷知冀邢等州至均州防禦使利  
一補供奉官累遷西上閣門使終雄州團練使孫叔夜守稽  
仲初蔭蘭州錄事參軍蘭州地極邊恃河爲固每河水合輒戒  
嚴士不釋甲者累月叔夜以爲非計欲求要地以守有大都者  
介五路之間羗入寇必至彼點集然後議所向乃按其形勢建  
西安州自是蘭無羗患擢知襄城陳留二縣以蔣之奇薦歷知



安肅軍舒海秦三州大觀中獻文召試制誥賜進士出身遷右  
司使遼還圖上山川城郭服器儀範五篇從弟克公彈蔡京京  
遷怒叔夜貶監西安草場京罷召爲祕書少監擢中書舍人給  
事中極陳吏惰不虔之弊先時命出門下預列使衙徐填其事  
謂之空黃至是盡革之進禮部侍郎京復相以微猷閣待制再  
知海州劇盜宋江起河朔轉略十郡官軍莫敢嬰其鋒至是徑  
趨海瀕劫鉅舟十餘載所鹵獲叔夜募死士千人設伏近城而  
出輕兵距海誘之伺兵合舉火焚舟賊還顧鹵獲皆無鬪志伏  
兵乘之擒其副賊江乃降加直學士知濟南府羣盜猝至叔夜  
度力不敵乃取舊赦文令郵卒傳至郡聲言赦至賊聞小懈夜  
發卒乘其惰擊之盜奔潰追斬數千級以功進龍圖閣直學士  
知青州靖康初乞假騎兵并力斷金人歸路不報徙鄧州時四

道置師令叔夜領南道都總管金兵再至詔趣入衛即自將中  
軍子伯奮將前軍仲熊將後軍合三萬人至尉氏與金游兵遇  
轉戰而前十一月晦至都欽宗御南薰門見之軍容甚整入對  
請暫詣襄陽以圖幸雍帝領之加延康殿學士陳兵玉津園鎧  
甲光明帝登城叔夜率諸將拜舞城下帝益喜進資政殿學士  
令以兵入城俄拜簽書樞密院事連四日大戰斬其金環貴將  
二人帝嘉其功用蠟書檄告諸道城陷叔夜被創猶父子力戰  
車駕再出郊叔夜叩馬號慟衆軍皆哭帝回首字之曰嵇仲努  
力金人議立異姓叔夜語孫傳曰今日之事有死而已移書金  
帥請立太子以從民望金帥怒追赴軍中至則抗請如初遂驅  
以北道中即不食既次白溝馭者曰已過界河矣叔夜矍然起  
仰天大呼遂不復語明日卒年六十三訃聞贈開府儀同三司



王繼英祥符人少孤寄育於外氏稍長從趙普給筆札普罷相從者皆散繼英趨事愈謹普再入隸名中書五房真宗在藩邸太宗選為導吏兼內知客事名語曰汝昔事普朕所備知今奉儲宮尤宜盡節即位擢引進使咸平初累遷左神武大將軍樞密都承旨改客省使契丹入寇密請車駕北巡上從之命馳傳詣鎮定高陽關閱視行宮儲頓宣諭將士俄充澶州鈐轄與傅潛即軍中同名還屬吏尋掌三班院拜宣徽北院使同知樞密院事小心慎靖以勤敏稱上頗倚任之景德初拜密樞使嘗因進補軍校或訴繼英蒙蔽不為薦引上曰此輩正須因事立功方許擢用不可過求僥倖從幸澶淵還加特進檢校太傅卒年六十一上臨哭賜白金贈太尉兼侍中謚恭懿又為其祖父營

葬贈妻賈氏長樂郡太夫人錄子遵式遵誨遵度遵範皆顯官皆與門下親吏又數十人外王父諸舅有旅殞者亦詔有司給辦

蔚昭敏字仲明祥符人父興事周世宗數戰有功入宋從平太原終龍尉都虞候真宗為襄王昭敏自東班殿侍遷隸府邸即位授西頭供奉官累遷崇儀使冀貝行營兵馬都監契丹五千騎突至冀州城南昭敏帥部兵與戰敗之得其器甲賊遁去不失一人咸平四年領順州刺史定州行營鈐轄兼押大陣又為鎮定高陽關先鋒帝北巡至大名契丹退趨莫州昭敏與范廷召追至莫州東三十里斬首萬餘級擒生口甚眾契丹委器甲遁拜唐州團練使累遷至殿前都指揮使保靜軍節度使以足疾卒贈侍中時宮邸攀附者又有王守俊至濟州刺史翟明



至洛州團練使王遵度至磁州團練使楊保用至西上閣門使  
康州刺史鄭懷德至御前忠佐馬步軍都軍頭永州團練使張  
承易至禮賓使吳延昭至供備庫使白文舉至引進使昭州團  
練使彭睿至侍衛馬軍副都指揮使武昌軍節度斬忠至侍衛  
馬軍都虞候端州防禦使郝榮至安國軍節度觀察留後陳玉  
至冀州刺史崔美至濟州團練使高漢美至鄭州團練使楊謙  
至御前忠佐馬步軍副都軍頭河州刺史  
高化字仲熙真定人少沉勇有力不事耕稼學擊劍善射契丹  
犯河北化應募轉餉飛孤口留楊業戲下獲賊酋大鵬翼會又  
犯真定乃辭業還家屬悉被略去化從州將入京師遂隸禁軍  
選爲襄王府牽轡官王尹京命化巡內外八廂獲姦盜甚衆遣  
以金帛不受一日王趨惡召山府門馬驚墮幾殆化掖之起

益親信之卽位擢御龍弩直雙員都頭乾興初累遷天武右廂  
蜀州團練使天聖六年夏大雨命護汴堤夜馳至城西堤壞督  
守兵負土不能過命急取城隅所積材木塞之得無患仁宗嘉  
之歷鄜延涇原馬步軍副都總管權知渭州發兵襲名珠族不  
利左遷滑州總管改興州防禦使累拜殿前副都指揮建武軍  
節度使以老辭改武安軍知相州有大獄已皆論死化疑之移  
訊出其無罪三人踰年以右屯衛上將軍致仕卒年八十贈太  
尉諡恭壯化謹質少過馭軍有法雖起行伍頗知民事

楊崇勳字寶臣薊州人祖守斌事太祖爲龍捷指揮使父全美  
事太宗爲殿前指揮使崇勳初蔭爲東西班承旨事真宗于東  
宮聞其嗜學授以書令習之稍通兵法及前代興廢之事卽位  
遷右侍禁西頭供奉官寄班祇候討王均爲承受公事雷有終



使入奏捷賜錦袍銀帶噐幣擢內殿崇班歷遷樞密都承旨未  
幾領英州防禦使會都知周懷政謀逆崇勳夜與丁謂曹利用  
共發之翌日懷政誅擢崇勳內客省使領桂州觀察羣牧置制  
使仁宗卽位歷拜宣徽南院兼樞密副使宮中火爲脩葺副使  
章獻與仁宗言先帝稱其質信可任大事乃進樞密使坐上章  
懿后問邀宰相張士遜過園亭飲酒中丞范諷劾能以同平章  
事領節河陽三城判許州改陳州景祐初懷政家人訟寃遂罷  
平章連知壽與亳陳三州契丹將渝盟朝廷擇將備邊復拜同  
平章事判定州以老不任事徙成德軍又徙鄭州坐其子宗諤  
納賕枉法以左衛上將軍致仕卒贈太尉諡恭密崇勳性貪鄙  
喜中傷人每對上輒肆言中外事人以是畏之

夏守恩字君殊榆次人父遇爲武騎軍校與契丹戰歿補守恩

下班殿侍給事襄王宮遷西頭供奉官真宗卽位四遷至北作  
坊使普州刺史從幸澶淵數見任使歷四廂都指揮泰州防禦  
使帝不豫章獻預政以守恩領親兵倚用之擢殿前都虞候天  
聖初爲永定陵總管領工徒萬數穿皇堂地上石相半事聞雷  
允恭伏罪守恩徙節河陽三城歸本鎮歷天雄泰寧武寧三節  
度使所至恃寵驕恣不法子元吉通賂遺市物多不予直通判  
李參發其賊除名編管連州卒弟守贊字子美四歲而孤以  
兒故名入襄王宮使傅婢撫視稍長習通文字俾典東宮工作  
事卽位授右侍禁命往綏銀同察李繼遷幾事遷西頭供奉官  
寄班祇候幸大名爲駕前走馬承受時康保裔戰沒部曲畏誅  
揚言保裔降賊守贊受密詔往廉得其情還奏詔恤其家幸澶  
淵祀汾陰皆爲駕前巡檢遷綾錦副使幸亳州命脩行宮轉崇



儀使甚見親信還累遷樞密都承旨兼領三班院每契丹使至  
與楊崇勳迭為館伴凡十餘年擢侍衛親軍殿前馬步軍都虞  
候歷五軍節度使定州路都總管寶元二年召知樞密院事帝  
問西事守贇言願併小障兵以據衝要伺便邀擊功或可成帝  
然之辨明劉平石元孫之枉自請將兵擊賊換宣徽南院使兼  
經略安撫緣邊招討使命以御劔隨之然性實庸怯寡方略不  
為士卒所服尋詔駐軍河中居數月徙屯鄜州康定元年召同  
知樞密院事以子隨卒請罷以天平軍節度使判澶相瀛三州  
卒贈太尉諡忠僖 隨字君正慎重少過頗好儒多與士大夫  
游初蔭殿侍仁宗在東宮為率府副率卽位除內殿承制歷閣  
門使出為天雄兵馬鈐轄歷泰州防禦使元昊反為鄜延路副  
都總管獲其偽書投錦袍銀帶境上以問金明李士彬隨力辨

其亾他士彬感激擊賊白效轉耀州觀察使知亳州劉平敗徙  
知河中以父為經略留充會靈觀使守贇還遂任陝西緣邊招  
討副使卒贈昭信軍節度使諡莊恪

閻日新宿州臨渙人少為本州牙職補三司役吏淳化中選隸  
壽王府主郎中記簿卽位擢供奉官提點雄霸靜戎軍榷場咸  
平中歷遷供備庫副使慶州都監景德初管勾邠寧環州駐泊  
兵馬從部署張凝屢入邊界焚羗人族帳連知涇與慶州上言  
野溪三門等族恃險盜桀黠難制請開古川道東至樂業鎮西  
出府城從之就轉供備庫使知環州兼邠寧環慶路鈐轄緣邊  
都巡檢使二年遷如京使領萬州刺史朝陵東封皆為行宮使  
祥符初改文思使日新本起側微好作為以圖進取自陳筋力  
尚壯願守邊城效用遂真拜防州刺史知渭州兼涇原路駐泊



弘簡錄 卷一百六十一  
欽轄將祀汾陰改知同州車駕至迎謁獻方物勞問久之賜襲衣金帶還又設絲樓樂伎以迎駕明年徙知徐州代還擢右領軍衛大將軍昭州團練使知單州以疾卒年六十八嘗言羣臣子弟蔭官者往往未童亂卽受俸望自今年二十以上始給又京城百官早朝而學士丞部舍人以上導從太盛望令裁減其建白多類此

劉謙博州堂邑人曾祖直以純厚聞里中有盜其衣者知而不問州將義之賜以帛不受父仁罕輕俠自任五代末寇盜充斥率衆斷澶州浮橋誘獲賊徒出芻粟給官軍補內黃鎮將嘗至酒家遇羣寇暴集以計悉梟其首詣留守向拱拱壯之補汜水鎮將俄爲散都頭宋初遷龍衛都指揮使征廣南爲前鋒還改同州都校卒謙少慷慨不拘小節亡命京師應募從軍補衛士

稍遷內殿直都知真宗升儲嘗補宮衛太宗御便坐親選諸校授西頭供奉官東宮親衛都知賜袍笏靴帶器幣卽位授洛苑使謙本起行伍不樂禁職改殿前左班指揮使咸平初累遷殿前都虞候景德初歷殿前副都指揮振武軍節度使上言邊城早寒常例八月給屯兵冬衣請於六月預給著爲例上東封詔謙都總山下馬步諸軍與左藏庫副趙守倫閱視山門著籍者乃得上禮成進都指揮使移保靜軍節度使卒年六十贈侍中子懷懿東染院副使懷詮內殿崇班閣門祇候

張孜初名茂實以諱改今名母爲懽獻太子乳母孜方襁褓真宗以付內侍張景宗令謹視之養以爲子蔭補三班奉職給事春坊司轉殿直遷供奉官閣門祇候爲陳州兵馬都監築堤袁家曲捍水陳以無患五遷至供備庫使恩州團練使真定路兵



馬鈇轄歷知莫貝瀛三州爲人安重習事運使張盪之奏罷冀  
貝驍捷軍士上關銀鞵錢又罷保州雲翼別給錢孜皆力止之  
不聽軍果怨叛尋副富弼使契丹以勞累遷并代副都總管河  
東更鐵錢人情疑貳部兵相率扣府門閉不納幾爲亂孜策馬  
從數騎往諭之皆散還營遷濟州防禦使侍衛馬軍都虞候轉  
殿前司加桂州觀察使虎翼兵十餘人乘夜大譟欲爲變孜擒  
首惡斬之然後聞遷昭信軍節度觀察留後侍衛馬步軍副都  
指揮使中丞韓絳論孜自幼長於禁中頗涉疑似請罷兵柄出  
爲寧遠軍節度使知潞州徙陳州仁宗復召孜絳疑富弼引之  
奏請黜弼弼引咎求罷然進擬實不自弼絳坐謫蔡州孜尋亦  
出知曹州卒贈太尉諡勤惠 張盪之字景山祕之子及第補  
樂清尉累遷集賢校理通判常州知溫州蔡齊薦其材擢提點

河南刑獄知亳州楊崇煦恃恩不法誣蒙城知縣王甲盪之寢  
得寃狀出之配姦吏若干人徙廣南東路轉運使夸人有犯書  
多慘酷盪之請以漢法從事權度支判官改京西轉運加直史  
館徙河北時諸州發卒斬西山木多致竄匿盪之戒以毋得深  
入自是緣邊士卒率不敢逃還爲戶部鹽鐵副使擢天章閣待  
制河北都轉運兼按察使所益保州廣信安肅軍自五代以來  
別領兵萬人號策先鋒太祖嘗思之有功每出援隣道別賜優  
給其後不復出主者坐糜廩賜通判石待舉請罷之內侍楊懷  
敏不悅巡檢司雲翼卒遂殺待舉閉城作亂盪之自魏馳至城  
下召諸將田况等攻城殺降卒數百坐奪職知虢州又坐冀州  
人段得政賕囑事下御史按劾奪三官監鄂州稅起知漢陽軍  
俄遷刑部郎中復待制歷湖揚二州以光祿卿致仕卒



白守信開封人祖延遇仕周至鎮國軍節度使父延訓宋初爲龍捷都指揮使領博州刺史守信蔭補東班承旨遷右班殿直以善射授供奉官帶御器械三遷至供備庫使咸平三年契丹犯邊與王能成邢州俄又與麥守恩石贊領先鋒禦之敵退復與荆嗣督河北京東捕賊四年命爲鎮州行營鈐轄領騎兵躡大陣西偏屢當格鬪改定州鈐轄復徙鎮州王繼忠陷師還渡河敵人乘之守信據橋控矢每發必中敵不敢近真宗與輔臣議三路禦敵皆言威鹵扼北道要害尤甚守信久練邊計知戎務乃命爲鈐轄戍順安景德初契丹侵長城口與魏能發兵破之追北過陽山斬獲甚衆賜錦袍金帶又徙屯冀州轉運劉綜舉守信智勇材幹堪任將帥加領康州刺史提騎卒戍靜戎軍兼涖營田之役俄爲鎮定鈐轄改契丹前鋒獲輜重又入敵境

俘擒甚衆及契丹請和守信與曹璨特留任追叙前勞加合州團練使祥符三年副李廸使契丹再遷南作坊使卒甚悼惜守信居邊久名聞北庭喪還常賻外別資錢五十萬錄子以官謝德權字士衡福州人父文節仕王氏爲侯官令入南唐爲饒州團練使以驍勇聞世宗南征卽擐甲渡江潛規吳入號爲鐵龍後守鄂州拒宋師戰沒德權以父死事署莊宅副使歸宋補殿前承旨遷殿直陝西巡檢以勞就改右侍禁咸陽浮橋壞運使宋大初命德權規畫乃築土實岸聚石爲倉用鐵牛制之由是無患咸平二年宜州蠻叛陳堯叟命單騎入境諭以朝旨衆咸聽命加閣門祇候爲廣韶英雄連賀六州都巡檢使代還提點京城倉草場受命廣京城衢巷其規制廣袤及禁鼓昏曉之制皆所條上上悉從之有凶人劉擘僧澄雅誣訟執政與



許州民陰構西夏為叛詔德權監溫仲舒謝泌鞠問具奏其變  
時無濫獄帝將幸澶淵命城新樂縣遷供奉官又命浚北平砦  
濠葺蒲陰城奏言邊兵屯聚一處非便願速分戍鎮定高陽三  
路天雄城壘濶遠請急葺之其北宜亟治德清軍城以為豫備  
臣實慮蒲陰工作未訖寇必暴至既而契丹果圍城德權單馬  
間道赴行在遷內殿崇班提轄三班衙司為設條制均其差使  
有規免重役假名內侍主藏咸奏罷之上稱其有守命提總京  
城四排岸領護汴河兼督輦運先時主者因循但挑沙擁岸阻  
遇河流汎濫卽復填淤德權務令盡去浮沙至土為限棄沙隄  
外遣三班使分主其役為大錐以試凡引錐可入者卽坐所轄  
官吏多被譴免仍植柳數十萬以固堤岸又建議廢京師鑄錢  
監徙西窰務于河陰大省勞費改崇儀副使兼領東西外作司

凡役皆尅日而就東封命計度發運遷供備庫使預脩玉清宮  
劉承珪勞役過甚日與忿爭不能奪遂求罷復領京城倉草場  
導金水河自皇城西環太廟凡十餘里祥符三年出知泗州改  
西染院使卒年五十八錄其子平為定遠主簿德權清苦勤幹  
好興功利多所經畫見官吏徇私者必面斥故所至肅然然喜  
采察纖微朝論惡之

安俊字智用其先太原人祖贊高州團練使仁宗開資善堂俊  
以將家子謹厚選為祗候卽位補右班殿直累遷環州都監破  
元昊吃吼井那諸砦韓琦上其功遷內殿崇班環慶路都監徙  
涇原與狄青范格同召使備北邊擢內園副使會葛懷敏敗命  
為秦鳳路鈐轄復徙涇原因條上禦戎十三事改原與麟州遷  
六宅使貴州刺史知忻代二州為帥臣誣奏降京東路鈐轄知



青州富弼為辨理真除號州刺史徙知滄涇冀三州秦州築古渭城徙秦鳳路總管歷侍衛步軍都虞候陵州防禦使卒贈閬州觀察使俊在邊久故羌人識之種世衡嘗問降俘若屬於吾將誰畏曰畏安太保指俊於坐曰此長髯將軍是也

趙振字仲威雄州人景德中從石晉于順安軍獲契丹陣圖授三班借職監押隰州兵馬捕盜青灰山殺獲甚衆高平蠻叛徙湖北都巡檢兼制置南路振以南方暑濕弓弩不利別創小矢激三百步中輒洞穿蠻遂駭散歲中遷慶州沿邊都巡檢使時金湯李欽白豹神木馬兒高羅跋滅三族尤悍難制振募降羌啗以利令相攻破十餘堡欽等自詣來歸振為置酒取細仗植白步外共射振十矢皆貫欽等驚誓不敢犯明年涇原屬羗胡薩逋哥等叛鈴轄王懷信以兵屬振屢捷常從數十騎遇賊十

倍射殪數十餘悉退散未幾賊數萬圍平遠砦都監趙士龍戰沒振出別道力戰抵砦奪取水泉率敢死士破圍賊走追斬數千級徙涇原都監歷知順安保安廣信軍改京東都大提舉捉賊知環州加領象州防禦使元昊將反為金銀冠佩飾甲騎遺屬羗振潛以金帛誘取之以破其勢時東莪金明萬劉諸族勝兵數萬悉為賊有及劉平等敗惟環慶無患擢龍神衛四廂都指揮使鄜延路副都總管知延州尋改捧日天武四廂語將吏曰賊必乘勢以進勢宜固守賊果塞門砦振坐擁兵不救貶太子左清道率府率潭州安置踰年復右武衛將軍惠州團練使并代路兵馬鈴轄就遷副總管元昊既破豐州將襲近砦振率鈴轄張亢麥允言出麟州深栢堰擊破之兼領嵐憲六州軍事河外饑設法通砦外商得米數十萬斛軍民以濟進博州防



引簡錄 卷一百六十一  
禦使改解州終左神武軍大將軍振剛強自負有武力便弓馬  
喜謀畫輕財尚義衆樂爲用子珣瑜璞皆工騎射知名珣年  
十六仁宗召試便殿除三班借職復闕武藝授殿直令呂夷簡  
試以策略條對數千言進閣門祇候爲濠州兵馬都監隨父西  
邊訪得五路徼外形勝利害作聚米圖經五卷并上五陣圖兵  
事十餘篇帝給步騎使按陣旣成臨觀之陝西招討陳執中薦  
爲緣邊巡檢使擢通事舍人監涇原路兼治籠竿城授兵萬人  
御賜鎧仗令自擇偏裨參佐近城麻壇黨留百餘帳爲暴珣引  
兵二萬自靜邊歷揆吳抵木寧襲賊俘獲數千計靜邊將劉滄  
殿後爲賊所掩復從騎數百拔出之瞎瑄居龕谷無所屬珣以  
書招之遺以綵錦遂聽命聞元昊大入徙軍新壕外議欲掩襲  
時葛懷敏屯五谷口珣語曰敵遠來鋒銳莫若依馬欄城布柵

以扼其歸路守鎮戎城以便餉道俟其衰擊之此必勝之道不  
聽兵遂逼鎮戎城越界壕抵定川未及陣夏人引鐵騎來犯珣  
居陣西北與瑜戰甚力東壁兵輒潰中軍大擾珣揮刀斧手前  
鬪夏衆稍却我軍復陣懷敏詰朝退就食鎮戎俄夏騎四合珣  
被擒瑜以身免人多惜之後卒贈莫州刺史

孟元字善長洛州人性謹愿少孤頗喜讀書與劉謙俱隸禁軍  
元以挽彊選補殿侍遷散都頭指揮至如京使并代兵馬鈐轄  
徙高陽真定等路討王則赴城下被數十創中機石墜濠中旣  
出戰愈力募死士山永濟渠穴地以進賊平改右驥驥使徙大  
名府路鈐轄河朔饑權知滄州民倚鹽活歲荒不售元度軍食  
有餘悉用易之得不轉徙中丞郭勸薦擢普州刺史遷宮苑使  
專管勾麟府軍馬事護築永寧堡敵不敢動歷遷并代大名府



路副都總管徙定州鄜延路卒贈遂州觀察使 劉謙字漢宗  
開封人由衛士至捧日右廂都指揮使領嘉州團練使兼京城  
巡檢討元昊改博州團練環慶路馬步軍總管兼知邠州生平  
不讀書區處鬪訟曲直皆當理前守者強市民物以飾廚傳謙  
至獨無所撓邠人頗愛之夏竦奏為涇原路總管徙知涇州夏  
人寇鎮戎軍謙引兵深入破其聚落以功遷龍神衛四廂都指  
揮終象州防禦使贈永興軍節度觀察留後  
張綸字公信潁州汝陰人少儻任氣補三班奉職遷右班殿  
直從討王均論降寇數百不殺以功遷右侍禁慶州兵馬監押  
擢閣門祇候益彰簡等州都巡檢使部卒縱酒掠居民綸斬其  
首惡數人徙荆州提點刑獄遷東頭供奉官提點開封府界縣  
鎮公事使靈夏還擢知辰州會溪峒彭氏蠻內寇綸築蓬山驛

賊路不通遁去徙知渭州改內殿崇班知鎮戎軍蠻復入寇再  
為辰澧鼎等州緣邊五溪十峒巡檢安撫使論蠻酋禍福還所  
掠民遺官與盟刻石示信久之拜江淮制置發運副使奏除通  
秦楚三州鹽戶宿逋官助器用鹽入優與之直歲增課數十萬  
復于杭秀海三州置鹽場歲入課百五十萬居二歲增上供券  
八十萬疏五渠導太湖入于海復租米六十萬開長蘆西河以  
避覆舟之患又築漕河堤二百里于高郵北旁鈿鉅石為十礎  
以泄橫流泰州有捍海堰延袤百五十里久廢不治歲患海濤  
冒民田綸議脩復論者難之表三請願身自臨役遂命兼知泰  
州堰既成州民利之為立生祠居淮南六年遷文思使昭州刺  
史為契丹隆緒弔慰副使歷知秦瀛滄州再遷東上閣門使真  
拜乾州刺史徙知潁州卒綸有材略所至興利除害性復寬恕



喜施子每見漕卒凍餒道死輒推俸錢市絮襦千數衣之  
趙滋字子深開封人父士隆天聖中爲閤門祇候邠寧環慶路  
都監戰沒錄滋三班奉職少果敢任氣有智略康定初以右侍  
禁選捕京西叛卒有功累除涇原儀渭鎮戎軍都巡檢會渭州  
得勝砦主姚貴殺監押崔絢劫宣武神騎卒千餘人叛攻羊牧  
隆城滋馳至諭降八百餘人貴窮出走招討使令滋給賜降卒  
遷補將吏滋曰如是是誘其爲亂也藏牒不奉命使怒故賞弗  
行范仲淹經略陝西舉其可用授閤門祇候爲鎮戎軍西路都  
巡檢令提舉捕捉京西賊張洸數月平之安撫富弼再舉爲京  
東路都巡檢登州乳山砦叛兵殺巡檢滋承檄驗治馳入其壘  
次第推問誅首惡數人得黨與百餘付獄衆莫敢動以獲盜功  
超授供備庫副使定州路駐泊都監韓琦以爲真將帥材命權

并代路鈐轄改管勾河東經略司公事建言代州寧化軍地皆  
肥美募人田作教戰射爲堡砦民獲其利遷西上閤門副使知  
安肅軍徙保州滋強力精悍有吏能所在稱治時契丹違約令  
民乘小舟漁界河中吏憚生事莫敢禁又造大舟十餘自海口  
運鹽朝廷以滋可任徙知雄州至卽繕治城壁樓櫓戒巡兵捕  
殺其人輦其舟漁者遂絕在雄六年契丹憚之值歲大饑簿書  
米鹽皆有條法出入無禁邊人德之加領嘉州團練使累遷四  
廂俱都指揮使英宗卽位轉端州防禦使步軍都虞候賜白金  
留再任卒贈遂州觀察使滋性廉謹月得公使錢不以入家馭  
軍嚴肅戰卒服役如廂兵莫敢有言然傲慢自譽此其短也  
范恪字許國開封人初名全少隸軍籍驍勇善射臨難敢前選  
入捧日軍爲殿前指揮使數有戰功康定元年試武伎擢內殿



引簡錄 卷一百六十一  
崇班慶州北路巡檢使預攻破白豹城既還夏騎追襲恪設伏  
崖險伺敵半度邀擊之斬首四百生獲七十餘人以功遷內殿  
承制嘗會諸道兵攻十二盤中流矢督戰愈力視礮石中有火  
爨者取以令衆曰賊矢石盡用竈下甕矣士卒聞之爭奮遷供  
備庫副使所用弓勝一石七斗其箭鏃如鏃名曰鏃弓羽間輒  
識官名姓氏每發必中至一箭貫二人他日取蕉蒿砦歸殿後  
爲數千騎所襲恪視矢箠止有二矢卽爲引滿之勢賊遠卻嘗  
與總管杜惟序鈐轄高繼隆將兵分討漢乞薛馬都鬼等三砦  
恪先破都鬼而繼隆圍薛馬不能下馳往取之既又援惟序下  
漢乞砦改左騏驎副使敵犯大順城諸將閉城自守恪獨率兵  
千餘戰克之改宮苑副使環慶路兵馬都監仁宗召見適有邊  
奏賊犯劉璠堡令乘傳亟往遷禮賓使榮州刺史環慶路鈐轄

手詔趣范仲淹起兵赴援恪晝夜兼行進至平涼賊已解遷洛  
苑使權秦鳳路兵馬總管累遷至保信軍節度觀察留後以疾  
出爲永興軍路副都總管卒贈昭化軍節度使

馬懷德字得之祥符人父玉東頭供奉官自言懷德可試引弓  
擊劔角觝補三班奉職爲延州南安砦主東路巡檢數以少擊  
西賊敗其衆范仲淹脩青澗城奏爲兵馬監押以所部兵入賊  
境破遮鹿要關二砦親射殺其酋狗兒廂主遷左班殿直又率  
蕃漢燒蕩海溝茶山龍相安化十七砦三百餘帳斬首數百級  
鹵馬駝牛羊萬數遷右侍禁韓琦薦授閤門祇候龐籍又奏爲  
東路都巡檢使有夸黑神厥保等十八砦犯邊趨僕射谷懷德  
先於谷旁引兵數千據高原待之斬首二百級得畜產噐械千  
數遷內殿崇班又以兵脩龍安城敵不敢犯改鄜延路都監城



綏平破賊青化押班吃當三砦殺獲甚衆復與國子博士高良夫會西人畫界籍具論前後功遷供備副使兼閣門通事舍人時用兵久民多亡散懷德獨招輯有方經略梁適奏請推其法諸路歷知保安軍環州環慶益利路鈐轄累遷至殿前都虞候步軍副指揮使隨州觀察使英宗遷靜難軍節度觀察留後卒贈安遠軍節度嘗中流矢鏃入於骨以弩弦繫鏃發機出之和斌字勝之濮州鄆城人選隸散直爲順德軍指揮使數打敵被重創十餘知軍事劉兼濟以兄平敗執送京師并逮其家斌密寓金帛他所慰安調護終始賴之定川之役輟所乘騎與將曹奭且戰且行得俱免狄青南征使將騎兵爲前鋒說曰兵疲於險利在速戰遂有歸仁驛之捷師還仁宗問破賊形曲加拊勞擢文思副使權廣西鈐轄留累歲徙涇原神宗召對盛言交

州有害無益願戒邊臣無妄動進帶御器械涇州部餓帥王廣淵命斌賑給擇地營居養視有法所活萬數南安入寇復徙廣西累遷皇城使昭州刺史撫水蠻羅世念犯宜州斌提步騎三千進討因示弱驕之蠻果大入誘至平坂列八陣以待張疑兵左右山上分精騎翼其旁蠻登嶺望見大驚斌自被甲步出士殊死戰遂大敗率其酋黨四千八百內附遷領榮州團練使知宜州進西上閣門使知邕州以老請還除高陽關副總管歷步軍都虞候卒年八十贈寧州防禦使斌老於爲將以恩信得邊人心嶺南珍貨一無所畜邊吏欲希功造事皆憚不敢發或巧爲謀報啓彘必折其姦謀故所至無事人多稱之子詵以蔭爲河北副將累官右武大夫威州刺史知雄州上制勝強遠弓式能破堅三百步外號爲鳳凰弓進相州觀察使在鎮十年頗能偵



敵遂興取燕之謀童貫召計事悅之奏為副統分麾下兵從種師道軍于白溝旬有二日見契丹尚強遽變前說貫劾說覘候不實貶濠州團練使筠州安置平燕肆赦獨不得還後復官卒

弘簡錄卷一百六十終

明刑部員外郎仁和弘齋邵經邦學

皇清翰林院侍講學士四世孫遠平校閱

庶官宋六之六

劉保勳

子錯

宋瑄

袁廓

附李順

張雍

陳世卿

索湘

袁逢吉

姚坦

子璠

琰

王子輿

鄭文寶

董儼

何蒙

慎知禮

子從吉

張佶

胡則

附龍昌期

張秉

父諤

黃震

邊肅

劉式

魏廷式

盧之翰

劉保勳字脩業河南人五代時處讓之子少好騎射後唐清泰中攝潞州左司馬隨署彰德軍衙內都校父卒補供奉官習刑名之學頗工詩桑維翰奇之擢太常丞歷漢為祕書丞周廣順



初以詳練法律薦兼大理正遷工部員外郎歷掌鄆宋楚三州  
鹽麴商稅宋初改戶部母喪起復掌斬口榷茶徙雲安監鹽制  
置使歲滿獻羨餘百萬開寶初遷司封員外監左藏庫六年知  
宋州太平興國初遷祠部郎中通判晉州二年遷爲江南西路  
轉運使賜錢百萬三年徙兩浙東北路親征晉陽改戶部郎中  
爲隨軍轉運借侯陟勾當軍前諸事會陝西北路轉運雷德驤  
調發沁州軍糧後期又命保勳代之太原平擢知并州逾年入  
判大理出知昇州召歸點檢三司開拆司權領鹽鐵事遷兵部  
郎中兼判三司勾院八年右諫議大夫知開封坐冤獄免雍熙  
二年復起權御史中丞兼勾當差遣院北征知幽州行府事于  
利涉以開封兵曹督芻粟隨軍濟巨馬河王師不利保勳馬陷  
淖中利涉自後掖出之力不勝人馬相擠壓遂俱死年六十二

贈工部侍郎命恤其後擢孫巨川祕書正字後至北部郎中保  
勳性純謹未嘗忤物精於吏事不憚繁劇受君命不辭難接同  
僚多得其歡家無餘貲故聞者痛惜之至道三年又錄次孫世  
長爲正字咸平初妻卒賜錢十萬

劉蟠字士龍渤海人漢乾祐進士解褐益都簿宋初歷安遠軍  
河陽節度推官保義軍掌書記性清介能攻苦食淡然事苛刻  
好設奇詐以售知人主乾德五年召拜監察御史典染院事太  
祖多臨視蟠偵知駕將至職衣短後衣芒屨持挺督役頭蓬不  
治遽出迎謁上以爲勤事賜錢二十萬命代蘇曉掌京城市征  
頗稱幹集太宗生辰命爲使開寶七年與殿中丞劉德音同知  
淮南諸州轉運事部民販茶者衆蟠獨乘羸馬僞稱商人抵民  
家求市民家不疑出與之卽擒寘于法太平興國初就遷倉部



員外郎改轉運使歲漕江東米四百萬斛以給京師頗爲稱職  
秩滿乞留許再任賜金紫改駕部員外八年內艱起復知京城  
陸路發運會河決韓村大發丁夫塞之命調給其餉朝議東封  
擬拜水陸計度轉運使索湘副之俄歷工刑二部郎中充河北  
水陸運使入判本部事籍田畢遷左諫議大夫淳化初兼同考  
京朝官差遣卒年七十三賜錢十萬給其喪事子錯初蔭大  
理評事咸平二年擢進士嘗獻幸太學頌真宗頗嘉賞之出示  
輔臣召試命直史館累遷至戶部郎中終三司鹽鐵副使  
宋瑞字寶臣渭南人監察御史鸞子乾德中及第解褐青城簿  
辟吳廷祚永興書記擢著作佐郎知綿州太宗改右贊善大夫  
峽路運副代還賜緋魚出知秦州有善政就拜監察御史充陝  
西轉運使以治績賜錢五十萬再知秦州安集諸戎部內清肅

雍熙初召歸賜金紫授度支判官遷屯田郎中知益州屬歲饑  
多盜以方略擒捕招輯盜屏息下詔嘉獎端拱初就拜右諫議  
大夫爲西川轉運使加左諫議改陝州性清簡歷官三十年未  
嘗問家事好寫書常聚至數千卷以貽子孫曰使不忘本也淳  
化中移蘇州值三吳饑疫瑞病卒年六十一上聞嗟悼錄其子  
明遠爲浦城簿復登淳化進士爲都官員外郎柔遠亦及第垂  
遠閣門祇候

袁廓劍州梓潼人舉蜀進士入宋歷雙流西平二簿勾稽漏籍  
得民丁萬餘州將薦其勤職遷上蔡令課最擢右贊善大夫御  
史府分領推事掌樞貨務性夸誕敢大言好詆訐太祖待以奇  
士太宗遷殿中丞出知楚州歸掌京師市征歲中增課數萬緡  
賜緋魚賚錢五萬命按錢俶納土得以便宜從事藉浙中諸州



軍倉庫之物悉輸京師詔罷異之每公宴必別席而坐復命知  
鄆拜監察御史通判房州幾察秦王延美賜白金三百轉殿中  
侍御史戶部度支判官與陳恕李惟清專計度芻糧收戶部員  
外郎籍田轉本曹郎中判戶部勾院廓強項好爭數與判使等  
較曲直於上前上每優容之然以勾稽過密由是簿領擁積爲  
郡吏所訴詔御史辨問廓謁見宰相趙普自理普面責與侯莫  
陳利用交通狀廓驚慙泣下不能對數日出知溫州就遷鴻臚  
少卿與同郡袁仁甫不協互有論奏上遣光祿丞牛韶往按廓  
以憤死上聞追悼驗仁甫所訴無實特免韶官削仁甫名配隸  
商州贈廓右諫議大夫錄其子丘賀爲奉禮郎

樊知古字仲師其先長安人曾祖偁濮州司戶參軍祖知論事  
吳爲金壇令父潛事李景知漢陽石埭二縣因家池州知古初

名若水應舉不第謀歸朝僞爲漁釣往來采石江上以小舟載  
繩維南岸疾抵北岸以度江之廣狹開寶三年詣闕上書言江  
南可取狀太祖令送學士院試賜及第調舒州軍事推官恐老  
母與親屬留者爲江南所害詔煜令遣之煜聞命厚給齋裝護  
送至境七年召拜右贊善大夫王師倚爲鄉導下池州命領州  
事州民保險者擊之連拔二砦擒其魁以獻餘潰散獻議造浮  
橋先試於石碑口移至采石三日而成不差尺寸事平拜侍御  
史乘傳按行江南諸州詢訪利病兼知轉運事奏蠲江南官茶  
十分之八征其餘以便商人增市直以惠小民罷鐵錢十當銅  
錢一民甚便之太宗卽位改今名授庫部員外郎換金紫轉京  
西北路轉運加虞部郎中改知邠州移鳳翔入爲鹽鐵判官出  
領荆湖轉運使雍熙初遷比部郎中會河朔用兵分諸郡爲東



西兩路以給漕輓以知古為東路運使端拱初遷右諫議大夫  
移河北西路二年就加措置營田使奏請脩城木五百餘萬牛  
革三百萬上曰所請過當恐重困吾民令有司量給官物與之  
度支李惟清請發河南十七軍州轉粟以備河北軍儲上恐妨  
農不許惟清固請上遣左正言馮拯乘傳與議知古請俟農隙  
令民轉餉所言稱旨拜給事中知古性明俊有才力吏幹捷給  
措辭辨治累任轉運甚得時譽然嘗以李煜時用兵權宜調斂  
知古悉奏為常額又知古微時辱於豫章洪氏至是以洪氏嘗  
掌昇州權酷進鉞錢數百萬責償銅錢以快意時論少之俄為  
戶部使頗以職事不治詔書切責聲名益減素與陳恕親善上  
嘗言及計司事有乖違者以為知古輕佻恕具以告後因奏事  
自解上怒恕漏泄兩罷之出知梓州改西川轉運使知古鬱鬱

不得志常稱足疾未嘗按行郡縣蜀中雖號富饒然土狹民稠  
耕種不足以給兼并者益規厚利自歸朝後庫藏悉入內府有  
司於常賦外更置博買務禁商旅不得私市布帛蜀民重困淳  
化中青城民王小波語其眾曰吾疾貧富不均為汝輩均之乃  
聚徒攻陷青城掠彭山殺縣令齊元振旁邑響應是年冬小波  
中流矢死眾推其妻弟李順為帥初黨與纔百人州縣失於備  
禦所在蠶起遂至萬餘攻蜀州殺監軍王亮及官吏陷邛州賊  
勢益張眾至數萬陷永康軍雙流新津溫江郫縣縱火大掠往  
攻成都燒西郭門不利引去陷漢興彭州旋陷成都官吏走東  
川知古坐擅離所部制置無狀朝廷特宥之詔復令掌兩川漕  
運尋改知均州以慙悻卒年五十二上嗟憫賜其子漢公同學  
究出身



張雍德州人姿貌朴魯中丞滕中正決其異日顯達壽考以女妻之開寶六年以毛詩中第釋褐東關尉太宗遷至祕書丞開封推官坐與劉侏勲同免尋復爲御史臺推直官淳化中累遷戶部使出知梓州就命爲西川轉運使王小波亂雍訓練士卒得三千餘人募彊勇千餘守城輦綿州金帛以實帑藏命推官陳世卿書記施謂權鹽謝濤治戎器伐山木爲竿銷鐘磬爲箭鏑紐布爲索器械悉備賊渠相里貴衆十餘萬附城下雍與監軍盧斌登堞望之兵皆老弱無鎧甲斌請開北門出擊雍不可曰賊或詐見老弱設伏誘我且城中吏民心未定脫墮姦計非良策也俄果有卒凭敵樓呼嘯將爲外應雍亟斬以徇賊設梯衝火車晝夜鼓譟城中大恐雍命發機石碎之火箭雜下賊稍退復於城西北隅治攻具雍命軍士曰開東門出擊賊賊望見

果伏精甲於城東以待雍乃密絕敢死士百輩出西北焚其攻具自午達申殆盡賊驚以爲神凶黨數乘城戰皆不補一日北風晝晦賊乘風縱火急攻北門雍與斌等領兵據門立矢石間固守不動賊爲之却長圍八十餘日會石知顯來援始潰去遣謂入奏手詔褒美擢雍給事中餘遷擢有差景德初雍累遷至兵部侍郎同知審官院車駕朝陵判留司尚書省出知鄧州以尚書右丞致仕卒年七十雍小心吝嗇蒞事勤恪好爲米鹽苛察以肅下恃其清幹受知益矯厲以取名譽所至晏犒率皆裁節公錢聚爲羨餘會集賓佐纔糲食而已在三司置簿籍有按前急馬前急急中急之目頗爲時論所誚子太冲官殿中丞陳世卿字光遠南劍人登進士爲衡州推官改梓州世卿素善射賊薄城時獨當城一面親射中數百人賊爲稍却丁外艱雍



表其有材復出視事就改掌書記還遷祕書郎歷廣州通判加  
博士召見賜緋景德初擢福建轉運使覘畫南劔安仁等銀場  
歲增課羨累遷荆湖北路轉運使屬澧州慈利縣下溪等四州  
蠻侵縣境朝命與祇候史方知澧州劉仁霸同討之遂還所侵  
地標正經界取其要領納還所掠漢口復置澧州武口等砦以  
控制之賜詔嘉獎還朝屢述溪洞利害召對願効煩劇授祕書  
少監知廣州加賜金紫至郡奏除計口買鹽之制人多便之卒  
年六十四錄于南安主簿儼爲太祝

索湘字巨川滄州鹽山人登開寶進士調鄆州司理叅軍受詔  
鞫齊州大獄連逮千五百人事隨以白太平興國四年和峴薦  
其能累遷監察御史命與戶部推官元玘按行河決民田改河  
北逆副經度供餽以能幹聞加屯田員外郎會君子館敗契丹

乘勝據中渡橋塞土門將趨鎮州諸將計議未定湘爲田重進  
畫謀結大陣東行聲言會高陽關敵果擁衆邀于平鹵城我師  
乘夜而南入鎮陽據唐河乘其無備破砦柵敵兵遁走雍熙中  
召爲鹽鐵判官改駕部員外端拱二年陞虞部郎中河北轉運  
使有訟其擅易運絲自用者責授膳部員外知相州會羣盜白  
晝抄劫湘擇精銳三百掩擊盡擒之運使王嗣宗狀聞詔復舊  
官爲河東轉運使遷忻州推官石宗道憲州錄事胡則爲幹職  
自隨所至州郡勾檢其簿領明年大將王超等率師趨烏白池  
抵無定河水源涸絕軍士渴乏湘命輦大斂干枝隨令鑿井衆  
賴以濟真宗卽位入爲右諫議大夫復充河北轉運使奏罷郡  
民歲釀并靜戎威武二軍鬻茶及北砦山麓銀冶德州舊賦民  
馬給驛又役民爲步遞湘至悉代以官馬兵卒人皆便之疏言



榷場易雜姦偽恐啓邊釁又新樂蒲陰兩縣地窄非屯兵之所  
皆奏罷之湘長於吏事所歷邊郡必廣儲畜爲備豫計出入軍  
旅頗著能名建議茶茗與蕃夸互市道遠多損許商賈緣江載  
詣邊郡旣免道途之耗復有征算之益咸平二年入爲戶部使  
受計詳定三司編敕坐與王扶交相請托擅易版籍責授將作  
少監後復知廣州卒其子希顏護喪歸葬

袁逢吉字延之鄆陵人曾祖儀仕唐以軍功至黃州刺史祖光  
甫尉氏令父蟾大理評事逢吉四歲能誦爾雅孝經七歲兼通  
論語尚書周太祖召試賞其精習賜束帛開寶八年擢三傳第  
釋褐清江尉知州王明薦其能就除豐城令運使張去華條上  
治狀名爲春秋博士淳化中累遷至水部郎中呂蒙正薦其經  
術宜任學官會蜀叛授西川轉運使至道初徙荆湖北路憚遠

不赴罷知夔州川陝採訪使上其治迹與朱協李虛已薛顏邵  
曄查道劉檢同賜褒諭祥符中歷官鴻臚少卿卒年六十九逢  
吉性脩謹練達時務郟州牧馬草地侵民田數百頃牒訴連不  
決命逢吉按視至則悉還所侵田民咸德之兄及甫歷京東峽  
路轉運使至駕部郎中子成務比部員外郎京東轉運副使從  
子楚材至虞部員外郎

姚坦字明白曹州濟陰人開寶中擢第調將陵尉歷知潯州太  
平興國初召還爲著作佐郎諸王出閣選爲皇子翊善賜緋魚  
歷轉考功郎中仍爲益王府翊善垣性強固王嘗爲假山旣成  
召賓僚樂飲坦獨俛首王強使視云但見血山耳安得假山王  
驚問故對曰此山皆民租所爲每見州縣催科捕人父子兄弟  
鞭笞流血被體非血山而何時大內亦爲假山聞而毀之王好



佚豫坦每暴揚其事上諭曰元傑知書好學亦足爲賢王少不  
中節須婉辭規諷頃之左右教王稱疾不朝太宗召乳母問狀  
答曰王本無疾徒以姚坦檢束居常不得自便故成疾耳上怒  
曰吾選端士輔王爲善王不能用而詐稱疾病此必爾輩爲之  
謀耳因命梓至後苑杖之召坦慰曰卿居王宮能以正道爲羣  
小所疾大爲不易卿勿慮讒間朕必不聽王薨改衛尉少卿判  
吏部南曹真宗卽位以其賣直取名不得大用景德初求補郡  
知鄧州運使表其治狀詔嘉獎之祥符初復知光州卒年七十  
五

魏羽字垂天婺源人自少屬文李煜召置弘文館時建當塗爲  
雄遠軍以羽爲判官王師渡江以城降擢太子中舍仍舊職金  
陵平知興州太平興國初知棣州改京兆府六年詔詣瀛州覆  
軍市租得隱漏數萬計因言有司調遷失平疏遠何由上達本  
州錄事叅軍郭震十年未代河間令崔能前任卽墨未滿歲遷  
秩請罪典司以肅欺弊賜詔褒諭遷太常博士歷官戶部郎中  
疏言三司職官頗衆願省其半可以責成仍條列利病二十事  
詔下有司詳議皆以爲便改鹽鐵判官時北邊多警朝議耕戰  
之術拜羽河北東路營田副使改兩浙轉運使淳化初遷爲度  
支鹽鐵使先是三司簿領繁積吏緣爲姦雖嘗更立所制未爲  
適中羽請依倣唐制分天下郡縣爲十道兩京爲左右計各置  
判官領之以羽爲左計使董儼爲右計使中分諸道以隸焉未  
久復以非便罷守本官出知滑州真宗累遷權知開封車駕北  
巡判留司三司再爲戶部度支以疾解職卒年三十八羽強力  
有吏幹小心謹事出入計司凡十八年習知金穀之事然頗傷



煩急不達大體太宗亦言其有心計但無執守與物推移耳歷劇職始踰四十鬚髮盡白子瓘字用之奏補校書郎知開封倉曹參軍持法精審明吏事上元起燈山宦者挾勢誅索瓘密以聞詔杖遣之以大理寺丞知衡山縣歷官提點廣南西路刑獄邕州獠戶婦女緣逋負沒為傭者千餘瓘悉奏還之就除轉運使蠲劉銀時雷化欽高州計口稅減柳州無名役四百名為度支判官徙梓州路轉運累遷太常少卿知廣州疏東北城門鑿東西澳為水閘時其啓閉拜右諫議大夫坐送貢餘椰子煎餉京師降知鄂州復陝西河北運使以給事中知開封政事嚴明吏民憚之俄因內東門闌得賂遺物付府窮治獄未上內降釋罪瓘不行執奏諫官吳奎論劾降知越州儂寇發獨廣州城堅不能下論功遷工部侍郎集賢院學士兼廣東經略安撫使

召還糾察在京刑獄進龍圖閣直學士知荆南五溪蠻彭仕義叛條上三策以招徠為上守禦為下攻取為失卒如所議徙澶滑鄧三州以吏部侍郎致仕卒瓘居官所至整辦與人置對未嘗屈然專任機數不稱循吏弟琰字子浩以恩授祕書正字為吏強敏名齊于瓘累官司農卿知福州徙廣州以疾告知江寧晚昏眊奏劾召判刑部進衛尉卿卒

王子興字希孟莒人曾祖甲以義勇為鄉人所推唐末淄青徐奈皆南結吳人以拒梁梁得三鎮吳人北侵益急沂密尤被其害州民聚為八砦以扞寇遂署甲為八砦都指揮使祖徽襲父職晉末賊帥趙重進掠高密徽戰沒父璉復嗣其職周世宗平淮陽始去兵即農厚自封殖命子興業文辭登太平興國進士解褐北海簿歷大理評事使西蜀決獄還累遷太常博士真宗



遷殿中侍御史因對與三司論列利害推子輿爲長轉度支員外郎每事上計司移報稽滯求兼省職因命爲鹽鐵判官仍領制置歲課五十餘萬咸平三年充淮南轉運子輿精於吏事周知利害裁量經制公私便之所至郡縣以公事申請者文牒紛委頃刻待報皆決遣略無凝滯明年召拜右諫議大夫戶部使方奏事疾作仆地掖出至第卒

鄭文寶字仲賢襄城人南唐右千牛衛大將軍彥華之子以蔭授奉禮校書二郎煜歸朝不忘舊恩欲一見衛者難之乃被篋笠冒爲漁者以見煜以爲忠後補廣文館生受知李昉登太平興國進士除脩武簿再遷光祿丞獻文召試改著作佐郎通判穎州外艱起知州事拜殿中丞使川陝均稅次渝涪聞夔州廣武卒謀亂以計平之遷陝西運副許便宜從事歲凶誘豪民出

東沽餓民八萬餘日會蔡勳賊趙德聚徒數千將趨劔閣時順文寶移書蜀郡分兵討勳勳等自環慶部糧道旱無人靈武者十二次就蓬蕃情習其語言經由部落每宿酋長帳中往往以交乎上遷太常博士內侍方保吉誣與陳堯叟交游故薦其弟堯名驥召置對文寶上書自明太宗察其誣坐保吉罪厚賜文寶而遣之俄加工部員外郎有龍猛卒戍環慶七年不得代恩歸謀亂文寶矯詔以庫金給將士自劾請償詔免之建議禁販青白鹽許商人轉安邑解鹽於陝西官獲其利而諸羌益因行之數月戎人乏食相率寇邊內屬萬餘帳亦叛上遣錢若水馳傳往視悉除其禁名諸族撫諭乃定朝議城古威州遣內侍馮從順來訪文寶言城之便但環州至伯漁伯漁抵青岡青岡拒清遠皆兩舍而清遠當羣山之口扼塞門之要芻車野



弘簡錄 卷一百六十一  
宿行旅頓絕。威州隔城東隅，堅石盤互，舊乏井脈，請先建伯漁。青岡清遠三城，為頓師歸重之地。俟二年間，秦民息肩，營田積粟，邊儲充實，脩五原故城，專三池鹽利，以金帛啖党項酋豪子弟，使為朝廷用，不惟安朔方，制豎子。至於經營安西，緩復河湟，此其漸也。詔從其議，復以金帛誘蕃酋，鬼羅鬼悉俄留其質子，與手書要約，許為刺史，令陰圖繼遷，而鬼羅等反告繼遷。繼遷上表請罪，上怒，文寶猶含容之。既而文寶復請禁鹽邊民冒法抵罪者，眾席義叟決獄陝西，廉得其狀，以語中丞李昌齡、昌齡以聞。文寶又擅減解鹽價三司，奏歲虧課二十萬，下御史臺鞠問。具伏詔書，切責貶藍山令，移枝江。真宗徙京山，咸平中召還授殿中丞，掌荆南權貨務。會慶州發卒護芻糧詣靈州，文寶其必敗，未幾果為繼遷所襲，遽名文寶為計，因獻河西隴石。

叙其地利本末，且言靈州可棄。狀時方遣大將王超援靈州，復文寶工部員外郎，隨軍轉運。甫至環，或言靈州已陷，文寶乃易服單騎間道抵清遠，盡得其實，遂奏班師。就除本路轉運使，上疏請再葺清遠軍。王漢忠以為生事，遂徙河東。又上言乞罷置管內廣銳兵萬餘於近南諸州，就糧宰相李沆等言其非便。上命錢若水詳議。若水所對與沆同，乃罷之。先是麟府屯兵悉仰河東輸餽，河澗裁數十步而往來阻，隔土人利於艱，至則芻粟增價，乃詔文寶於府州定羗軍經度，置浮橋，人以為便。繼遷圍麟州，令乘傳晨夜赴之，圍解。遷刑部員外郎，賜金紫。頃之寇準薦其熟於西事，可備驅策。復任陝西轉運，復有言其張皇者，又代以朱台符。景德初，契丹來犯，仍徙河東安輯所部募鄉兵。張邊備，領蕃漢兵赴河北，手詔褒諭。未幾復涖京西，陳和議。經



久之策上嘉之三年召還遇疾祥符初卒年六十一文寶好談方略以功名為已任久在西邊參預兵計心有餘而識不足又不護細行所延薦雖多未嘗慎擇晚年病發以其子鄆州推官於陵為大理寺丞移知襄城以便養文寶多撓縣政然能為詩善篆書工鼓琴有集二十卷撰談苑二十卷江表志三卷

董儼字望之洛陽人太平興國進士解褐大理評事歷遷淮南西路運副就命知光州儼狂躁務進不樂外郡上書乞還京師太宗入怒削館職徙知忠州俄復官與王繼昇同領水陸發運使轉刑部員外郎端拱初進郎中三司度支副使坐濯馬周事責濬州團練副使移知泰州踰年改知泉州召為京東轉運使歷知江陵府景德中入朝命議決開封滯囚俄判吏部銓以工部侍郎出知青州屬其姻家御史王濟言於西川轉運黃觀

薦已知益州不遂與都監趙贊密奏觀嘗酒廢職觀具述求薦反覆狀責授山東南道行軍司馬會赦起知郢州病疽卒年五十四儼俊辨有材然不學無操行所至以賄聞又廣畜姬媵頗事豪侈用傾狡圖位終以是敗士夫醜之東封恩復其官子仲容仲宗並為太子中舍兄偉至殿中丞

何蒙字叔昭洪州人少精春秋左氏傳李煜時獻書言事署錄事參軍入宋授洛州推官太平興國五年調遂寧令太宗征契丹還作詩以獻召見授右贊善大夫三遷水部員外郎通判廬州郡中火燔廨舍權務俱盡蒙假民器貸鄰郡麴米為酒既而課增倍部使上其狀詔賚緡錢獎之稍遷司門巡撫使潘慎脩薦其材敏驛召至京訪以江淮茶法蒙條奏利害稱旨賜緡魚及錢十萬後二日復對又上淮南酒榷便宜特改庫部郎中因



命至淮右提總其事歲有羨利使還留提舉在京諸司庫務求外知溫州坐舉人不當削一官真宗召復前資請開淮南鹽禁時卞袞楊允恭以禁鹽爲便共排抑之出知梧州改水部郎中上所著兵機要類十卷歷官至光祿少卿致仕卒年七十七慎知禮衢信安人父溫其有詞學仕錢俶終元帥府判官知禮幼好學年十八獻書署校書郎爲掌書記宋初從俶子惟濟入覲歸署營田副使入朝授鴻臚卿歷知陳州興元府母年八十餘居宛丘懇求歸養退處十年縉紳稱其孝及服除表請納祿至道三年以工部侍郎致仕自幼至白首歲讀五經周而後止每開卷必正衣冠危坐未嘗少懈咸平初卒年七十七子從吉字慶之俶之婿爲元帥府長史歸宋歷將作少監改太子右庶子真宗升儲換衛尉少卿卽位遷詹事頗以文酒自娛士夫

多與之游景德初判刑部留意法律天下所奏成案率多糾駁取所積犯人告身鬻之以市什器祥符初改衛尉卿糾察在京刑獄拜右諫議大夫判吏部銓選人舊試多籍地而坐從吉爲市筦席給之改給事中臨事敏速勤心公家所至務噉察嘗請對陳事上多其無隱八年權知開封請屬一無所受適豪民張斌妻盧氏與姪質交訟被搆削職天禧中復起以光祿卿致仕卒年七十喜爲詩時有警語兼工醫術子孫登第入仕甚衆紆朱紫者數人家富於財精治生又善爲饌具分遺權要晚年進趨彌篤以至于敗物論鄙之子鏞金部度支員外郎秘閣校理錯太常博士

張佶初名志言字仲雅本燕人徙渭南父昉有史材歷知雜御史省郎至殿中少監佶少有志節蔭補殿前承旨以習儒獻文



求試換國子監丞遷著作佐郎監三白渠知涇陽縣端拱初爲右贊善大夫命按曹州民被誣殺人者發擿姦伏民寃得雪至道中通判陝州部送芻糧赴靈武就改國子博士咸平初爲陝西運副賜緋魚至延安遇夏人入寇親督兵擊敗之三年徙西川運副討王均餽餉有勞遷虞部員外郎賊平分川陝爲四路授利州路轉運使有薦其武幹者召還授如京使歷涇原麟府鈐轄兼知鎮戎軍率兵與夏人戰親射殺酋俘獲甚衆餘黨遁去詔書褒獎賜錦袍金帶景德中徙益州鈐轄領宜州刺史遷文思使御軍撫民頗有威惠蜀人懷之祀汾陰以爲西京舊城巡檢禮成加北作坊使充趙德明官告使以薦知秦州置四門砦開拓疆境事具吐蕃傳時朝廷方務寧邊以信輕信易事邊境數擾徙邠寧路鈐轄天禧初召爲契丹國信副使再遷西

上閣門使涇原鈐轄卒年六十九 漲獵書史好吟詠勇敢善射有方略其總戎護塞以威名自任 子宗象兵部員外郎直史館至度支判官

胡則字子正永康人登進士補許田尉調憲州錄事參軍時命李繼隆討靈夏轉運索湘命則部送芻糧計足支一月則言爲百日備尚恐不支奈何僅一月耶湘懼無以給遣則入奏太宗因問邊策對稱旨命中書記其姓名頃之繼隆移文言兵且深入糧可繼否則謂彼師老將歸欲以糧乏爲辭耳姑以有餘報之湘從之後其言果效改著作佐郎員州觀察判官再遷提舉江南路銀銅場鑄錢監得吏所匿銅數萬斤籍爲羨餘不之罪改江淮制置發運使遷戶部員外郎真宗幸亳還擢三司度支副使與丁謂厚驟得進用謂罷出爲京西轉運使坐部內訛言



相驚徙廣西按宜州重辟十九人活者九人累遷太常少卿乾  
寧初復坐謂黨降知信州徙福州以右諫議大夫知杭州人權  
吏部流內銓坐失舉又責池州未行復改知永興軍徙河北都  
轉運使以給事中權三司使通京東西陝西鹽法人甚便之俄  
坐假御史王沿官舟販鹽其子又祈買酒場為張宗誨所發出  
知陳州劉隨言其奸貪復徙杭州再遷兵部侍郎致仕卒則果  
敢負材喜交結尚風義謂貶賓客皆散則間遣人至海上饋問  
如平日在福州有前守陳絳所延客龍昌期為人講易得錢絳  
獲罪併械昌期至即破械館以賓禮出俸錢為償所費昌期  
蜀人嘗註易詩書論語孝經陰符經老子凡百餘卷薦補四門  
助教文彥博守成都召置府學改校書郎以殿中丞致仕嘉祐  
中年八十餘詔取其書昌期野服自詣京師賜緋魚并絹百匹

劉敬言其具端害道其說詭誕穿鑿至訛斥周公不當推獎李  
所賜罷歸卒

張秉字孟節新安人父諤字昌言南唐祕書丞通判鄂州與州  
將許昌裔歸欵太祖召見勞賜良厚授右贊善大夫蜀平選知  
蜀州太平興國中除西川運副建議土人罕習舟楫因置戍權  
軍分隸管勾自是漕運無覆舟之患後終荆湖江浙制置茶鹽  
副使秉儀狀豐麗屬詞敏速善書翰太宗喜之擢真州科解褐  
將作監丞通判宣州遷監察御史為趙普所器妻以弟之女薦  
知鄭州還直昭文館遷右司諫命副趙昌言制置茶鹽入為右  
計司河南西道判官累遷工兵二部郎中真宗時判昭文館為  
左諫議大夫連知穎襄二州徙鳳翔訴母老貧窶詔給裝錢改  
江陵母憂起復知河南景德初換河陽瀘州駕當巡幸又徙滑



州迎謁韋城俾預從官侍食遣與齊州馬應昌濮州張晟往來  
河上部丁夫鑿凌以防契丹南渡召歸拜工部侍郎知審官院  
歷通進銀臺封駁司糾察在京刑獄與周起同試東封路舉人  
出知永興軍祀汾陰為東京留守判官轉禮部侍郎加樞密直  
學士知并州御製五言詩賜之徙相州暴疾卒生平無顯赫譽  
臨事少斷好諧戲脩飾衣服潔饌具每公宴或朋友會集自挈  
肴膳而往家貧常質衣以給

黃震字伯起浦城人登進士累遷著作佐郎通判遂州時有詔  
給軍士錢東川獨未及軍士欲為變震自主者曰朝廷意志東  
川耶殆詔書稽留爾主者以為然即開州帑給錢如西川衆乃  
定未幾詔果至震歷遷江淮發運使以論李溥與父訟奪一官  
罷畏丁謂權不敢白直謂貶復起知州徙廣東轉運矣罷廣

南歲進異花道路便之卒詔進其官等

邊肅字安國應天府楚丘人登進士除大理評事知於潛縣改  
太常博士魏羽薦為戶部判官祠南郊趙薦慶支員外郎至道  
初太宗以三司鈎取無法置行帳司以會財用之數命肅主之  
帳成遷工部郎中真宗幸大名經度行在糧草改判開拆司出  
知曹州徙邢州先是州屢地震城堞摧圯會契丹大入鎮魏深  
趙磁洛六州閉壁不出帝密詔肅若州不可守聽便宜南保肅  
匿詔不發督丁壯乘城大闢諸門率所部兵嚴陣以待老幼趨  
城者開門納之契丹莫測居三日引去擢樞密直學士徙宣州  
車駕朝陵徙河南還勾當三班院出知天雄軍徙真定累遷給  
事中與代者王嗣宗有隙諷通判東方慶訟肅貶岳州團練副  
使久之徙武昌安遠泰寧三軍節度副使連知光泗泰三州卒



子調終兵部員外郎福建轉運使

劉式字叔達袁州人李煜時舉三傳歸宋遷大理丞贊善大夫  
通州豐利監端拱中翔三年磨勘法命式主之賜緋又建議置  
主轄支收司以謹財賦出納遷祕書丞與陳靖使高麗至道中  
併三勾院爲一仍命式領之轉工部員外郎賜金紫式深究簿  
領之弊奏免舊日江淮間橫賦逋積至多人以爲便然多所條  
奏檢校過峻爲下吏所訟免官卒真宗追錄前効賜其子立本  
學究出身次子立之後爲國子博士立德立禮並進士及第立  
禮殿中丞

魏廷式字君憲大名宗城人少明法律監軍魏咸美以同宗延  
置館舍善待之中太平興國進士授朗州法曹掾運使李惟清  
奏其有吏材擢知桃源縣遷將作監丞改著作佐郎通判潁州

淳化二年始命李昌齡判審刑院以廷式明練刑章奏爲詳議  
官屢進對太宗悅其明辨遷太子左贊善大夫時初較廷臣殿  
最命與承旨趙鎔李著同勾當三班院多所規制越王生日令  
持禮物賜之超拜主客員外郎尋出知利州討李順就命充陝  
益二路運使入奏事不時召對問方略稱旨賜錢五十萬賊平  
入判大理寺至道初乘傳河朔決獄復出知宋潭二州湖南地  
士沃衍民喜訟產巧僞難辨至則立裁之吏民咸服轉吏部員  
外郎知桂州真宗改工刑二部郎中會王繼恩有罪下吏命同  
按之踰宿而獄具俄知審官院通進銀臺封駁司拜右諫議大  
夫知審刑院出知涇州卒年四十九錄其子舜卿太祝禹卿同  
學究出身廷式所至以嚴明稱剛果敢言上頗厚遇之然性頗  
險喜中傷人君子憚其口而鄙其行



盧之翰字維周祜州人曾祖玄暉鴻臚卿祖知誨天雄軍掌書記父寵蔡州防禦判官之翰少篤學家貧客遊館于單州防禦使劉乙登第授大理評事知臨安三遷殿中丞通判洛州募城中丁壯決漳御河以固城壁契丹入不能犯吏民詣闕借留召還遷太常博士歷河東京西轉運副使建議導潁河合于淮達許以便漕運累遷吏部員外郎討李順兼西川安撫轉運使坐薦大理丞李憲犯賊抵死又心知副使鄭文寶禁蕃商貨鹽非便不為勸止左授國子博士領使如故尋復職蒲洛河之敗詔分三道護送之翰違詔擅併為一大失輜重詔博士王用和乘傳逮捕繫獄除名貶許州司馬明年起為工部員外同勾當陝西轉運真宗復吏部以久次召拜禮部郎中賜金紫復遣之任咸平初有疾代還未幾復為京西運使朝議城故原州以張守

備之翰沮罷之其後西鄙不寧詔葺為鎮戎軍黜之翰知歸州三年授廣南西路轉運就改太常少卿知廣州無廉稱與運使凌策不協陰發其事徙知永州卒年五十七

陳靖字道卿莆田人父仁堅仕陳洪進為泉州別駕洪進歸朝有安術自險為亂靖終

張若谷 陳太素 杜會 張何

張台 鍾離瑾 張洞

陳靖字道卿莆田人父仁堅仕陳洪進為泉州別駕洪進歸朝有安術自險為亂靖終



弘簡錄卷一百六十二

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之七

陳靖 林勳附

邵驊

劉師道

盧琰 子士宗

王陟

李士衡 子丕緒

靳懷德

梁鼎

楊覃 從子大雅

馬元方

凌策

宋搏

鄭向

趙賀

李垂 子仲昌

陳知微

李防

梅詢

陳貫 子安石

狄棐 子遵度

郎簡

張若谷

陳太素 馬尋杜會

張傅

崔立

張逸

張旨

鍾離瑾

張洞

陳靖字道卿莆田人父仁璧仕陳洪進為泉州別駕洪進歸朝有豪猾負險為亂靖從步謁轉運使楊克異陳討平之策授陽



引簡錄 卷一百六十二  
翟縣簿契丹犯邊上五策于朝曰明賞罰撫士衆持重示弱待  
利而舉帥府許自辟士將帥專制境外太宗善之黜將作監丞  
爲御史臺推勘官父喪起復秘書丞直史館判三司開拆司會  
上欲復井田未有能建議者靖慨然上疏以爲法難遽行宜先  
命大臣爲租庸使或兼屯田制置副以三司判官通知民事者  
二人兩京東西千里檢責荒地籍逃民產募人耕作賜以室廬  
犁種口食不足給以庫錢別其課爲十分責州縣勸課分殿最  
爲三等其最者令佐免選超資殿者增選降資每州通以諸縣  
田爲十分視其殿最以行賞罰候數歲盡罷官屯田悉用賦民  
然後量入授田度地均稅約井田之制立爲定法頒行天下太  
宗語宰相呂端曰靖此策深合朕意命名見賜食下三司陳恕  
等雜議詔以靖爲京西勸農使擇大理丞皇甫選光祿丞何亮

副之選等言其功難成帝不謂然後以羣議終不同罷之出靖  
知婺州再遷刑部員外郎真宗卽位復列前所論勸農事言國  
家禦西北戎仰東南食設有不足則誤大計請自京東西及河  
北諸州大行勸農之法以殿最課州縣官吏歲可省江淮漕百  
餘萬有詔條上除爲京畿均用使請令刺史行春縣令勸耕賜  
孝悌力田者爵置五保以檢察姦盜籍游惰之民以供役作行  
三司議皆不果行後歷度支判官淮南運副兼管勾發運司公  
事徙河南轉運使論前李氏橫賦於民凡十七事詔罷其尤甚  
者徙知潭州祀汾陰爲行在三司判官歷京西東轉運使知泉  
蘇越三州歷遷集賢院學士知建州復徙泉州拜左諫議大夫  
與丁謂善以老疾轉秘書監致仕卒平生好學通古今多建畫  
於農事尤詳 林勳者賀州人登政和進士爲廣州教授高宗



建炎三年獻本政書十三篇言國家兵農之政。率因唐末之故。今農貧而多失職。兵驕而不可用。是以饑民竄卒。類爲盜賊。宜倣古井田之制。使民一夫占田五十畝。其有羨田之家。毋得再市。其原無與游惰末作者。皆驅之使隸農耕。以田之羨者。雜紐錢穀以爲十一之稅。又言宋之二稅視唐增至七倍。今本政之制。每十六夫爲一井。提封百里。爲三千四百井。率稅米五萬一千斛。錢萬二千緡。每井賦二兵馬一匹。率爲兵六千八百人。馬三千四百匹。歲取五之一。以爲上番之額。以給征役。無事則又分爲四番。以直官衛給守衛。是民凡三十五年而役使一遍。歲食米萬九千餘斛。錢三千六百餘緡。無事則減四分之三。皆以一兩之租稅供之。匹婦之貧。絹三尺。綿一兩。百里之縣。歲收絹四千餘疋。綿三千四百斤。非蠶鄉則布六尺。麻二兩。所收視絹

綿率倍之。行之十年。則民之口算。官之酒酷。與凡茶鹽香礬之權。皆可弛以予民。其說甚備。書奏以爲桂州節度掌書記。到任。又獻比較書二篇。大略謂桂州地東西六百里。南北五百里。以古尺計之。爲方百里之國。四十當墾田二百二十五萬二千八百頃。有田夫二百四萬八千。出米二十四萬八千斛。祿卿大夫以下四千人。祿兵三十萬人。今桂州墾田約祇萬四十二頃。下祇二十一萬六千六百一十五。稅祇錢萬五千餘緡。苗米五萬二千斛。有奇。州縣官不滿百員。官兵五千一百人。蓋土地荒蕪。而游手末作之人衆。是以地利多遺。財用不足。皆本政不修之故。朱熹甚愛其書。陳亮亦謂此書考古驗今。思慮周密。可謂勤矣。後世爲井地之學者。孰有加於勳者乎。要必有英雄特起之君。用於一變之後。成順致利。則民不駭。而可以善其後矣。



刑曰井田之學悉爲空言聊存其槩以備化原

邵曄字日華其先京兆人唐末喪亂曾祖岳挈族之湖南彭玕刺全州曄爲判官遂家桂陽祖崇德道州錄事參軍父簡連山令曄幼嗜學登太平興國進士解褐邵陽縣簿改大理評事蓬州錄事參軍知州楊金性暴率誣民張道豐三人劫盜悉寘于死曄白令核實不聽旣而捕獲正盜金坐削籍曄代還引對太宗嘉獎以能活平民賜錢五萬擢光祿寺丞仍以金事戒諭天下尋使廣南採訪刑獄歷遷工部員外郎淮南轉運使景德中假光祿卿充交趾安撫國信使會黎桓死子龍鉞嗣兄龍全弟龍延殺鉞自立龍明護復率扶蘭若兵攻戰事聞改命曄爲緣海安撫使許以便宜爲設方略貽書諭朝廷威德俾速定位明護等聽命奉龍廷上軍事有詔俟其事定卽以黎桓禮物改賜

新帥曄上言不若俟龍廷貢奉別加封爵而寵賜之真宗嘉納使還改兵部員外郎賜金紫營上邑至交水陸路及宜州山川等四圖頗詳控制之要判三司勾院坐失舉停任祥符初起知兗州表請東封就命爲京東轉運使禮畢拜刑部郎中再遷右諫議大夫知廣州鑿內濠通舟輒不能害卒年六十三

劉師道字損之開封東明人右樞密澤之子登雍熙進士授和州防禦推官歷保寧鎮海節度從事凡十年王化基呂祐之薦于朝擢著作佐郎遷殿中丞出知彭州就加監察御史運使劉錫馬襄上其治跡召歸會浦洛之敗奉詔劾白守榮太宗獎其勤而賜緋魚命使西川時經李順之亂有言川陝豪民多役旁戶小民爲佃客平居伏如奴隸有難則鳩集之請釋豪民爲耆長迭主旁戶有勞則授以官師道還奏迭使主領則爭忿滋多



引簡錄 卷一百六十二 四  
署以名級又重增擾害非便罷之改祠部員外郎出爲京東轉運使進度支副使咸平初范正辭薦其材堪長民徙知潤州三年改淮南轉運兼江浙荆湖發運使以漕事入奏累遷三司使從幸澶淵判隨駕三司充都轉運使坐弟幾道舉進士與考官陳堯咨交通責授忠武軍行軍司馬郊恩起爲工部郎中知復與秀州祥符二年改兵部郎知潭州遷太常少卿生平敏於吏事所至有聲吏民畏愛長沙當湖嶺都會劄煩析滯案無留事歲滿復加樞密直學士換左司郎中留一任以暴病卒年五十四性慷慨尚氣善談世務與人交敦篤工爲詩與楊億輩酬和時論稱之錄幾道試校書郎

盧瑛字錫圭淄州人右諫議大夫浚子登太平興國進士解褐歷城縣簿以太理評事知安吉縣改太常丞通判并州就除博

士爲開封判官中謝日真宗特召升殿而論賜緡錢尋奏獄空有詔獎之遷工部員外郎爲河北轉運副使時北鄙未寧調發軍儲糧道不絕瑛以職務修舉進秩刑部郎賜金紫會城邢州命專董其役幸澶州瑛單騎赴行在名對勞問轉大理寺丞契丹請和優拜吏部判三司勾院兼侍御史知雜事祥符二年爲三司度支副使祀汾陰判留守三司加吏部郎中拜右諫議大夫知永興軍勤於吏職所至以幹集聞頗知命先母而卒年五十九母尚年八十餘上憫之官其子士倫太常博士給祿終喪至工部郎中度支副使 士宗字公彥舉五經爲隰州判官歷審刑院詳議編敕刪定官提點江西刑獄侍講楊安國薦其經術仁宗御延和殿詔講官悉升殿聽士宗講易明日復命講秦卦授天章閣侍講賜三品服加龍圖閣判流內銓言李參郭



申錫兩人皆爲時用決河訟當驗問不宜遽鞠詔但黜申錫爲州進士宗直學士知審刑院通進銀臺司仁宗神主祔廟禮院請以太祖太宗爲一世而增一室士宗據禮太祖之廟萬世不毀其餘昭穆親盡卽毀示有終也今僖祖親盡當遷合於典禮不當添展一室後卒從增室之說議者咎之出知青州入辭論知人安民之要勸英宗守祖宗法以病改沂州熙寧初以禮部侍郎致仕卒年七十一士宗本以儒者長刑名之學在刑部審刑前後十數年人多稱其仁恕

王陟潞州上黨人登淳化進士補嵐州團練推官督運有勞遷晉州觀察推官至道初度支李擇言薦爲著作佐郎通判大名真宗尹京留爲開封司錄參軍前司錄閻仲卿喜議論敢爲屢升殿奏事真宗頗不悅之陟獨以謹幹被待遇卽位召賜緋魚

袋改著作郎進推官乘傳陝西督餉靈武咸平初遷太常博士爲河東轉運使賜金紫時趙保吉納欵屢遣陟與內侍張崇貴裁度邊事正其經界又副崇貴使夏州賜語命代歸與刑部員外董龜正同考試貢士改工部員外郎知棣州召入判三司鹽鐵勾院卒上以京府之舊甚憫之錄其子若拙奉禮郎後官太常博士若谷太廟齋郎

李仕衡字天均父益家饒於財由成紀徙京兆登進士調鄠縣簿京尹田重進命鞫五死囚士衡平反活其四重進稱之曰君有陰施必高大其門徙知彭山就加大理評事遷光祿丞父坐不法誅仕衡除名會赦寇準薦復其官領渭橋輦運通判邠州遷秘書丞知劔州王均反度不能守棄城焚芻粟輦金帛東守劔門賊至與鈐轄裴臻迎擊之斬首數千級入奏擢度支員外



郎賜緋魚復論棄城罪降監虔州稅召還判三司鹽鐵勾院時  
因梁鼎言調丁夫輦解鹽官自鬻之仕衡以爲困民不可聽已  
而關中大擾乃罷鼎擢仕衡荆湖北路轉運使徙陝西歲計軍  
費悉皆自辦罷出內帑緡錢真宗幸洛獻粟五十萬斛餽京西  
三十萬斛上多其材召爲度支副使言關右旣弛鹽禁而永興  
同華耀等處猶科率賣鹽年額錢詔悉除之遷司封郎中爲河  
北運使又奏罷內帑所助緡錢民苦歲給諸軍帛七十萬皆預  
假里豪倍償其息仕衡請方春戶給錢至夏輸帛民獲利而官  
用足會封泰山見上于行宮獻錢帛芻糧各十萬遷右諫議大  
夫祀汾陰又助錢帛三十萬與林特同提舉兩京陝西轉運事  
權知永興軍進給事中以樞密直學士知益州旱蝗發粟賑民  
多以所部供軍物爲貢及邊儲闕議者以爲言帝不之罪累遷

工刑二部侍郎權知天雄軍徙青州盜起淄青間以計誘梟賊  
首獻于朝名爲三司使更陝西入粟法使民得受錢與茶又許  
吏私市羊送京免其算聽民自採木輸官用償其直免羊道死  
并漂失破產之累帝作寬財利論以賜遷吏部侍郎仁宗拜尚  
書左丞以足疾改同州觀察使知相州更陳穎二州坐壻曹利  
用註誤降左龍武大將軍分司西京卒追復同州觀察使生平  
才智過人前後管計事二十年頗以貪聞積家貲鉅萬建大第  
長安里中子丕緒初蔭將作監簿歷虞部員外郎請削官侍  
養十餘年父喪服除起爲永興軍節度判官歷通判知解與華  
州至司農卿致仕卒居官廉靜不爲矯激家多圖書集歷代石  
刻爲數百卷

靳懷德本名湘博州高唐人祖昌範殿中丞父隱禹城令懷德



中明法科解褐廣安軍判官秩滿授鴻臚寺丞歷判相廣滄莫  
四州知德州運使劉通言其疊有善政連詔褒之徙知密州代  
還鹽鐵使陳恕判官王濟薦換如京使連知邗與滄州祥符初  
滄州吏民詣轉運李士衡借留遷文思使時江南旱歉命為洪  
虔十州安撫都監改知曹州選為益州鈐轄加領長州刺史就  
遷北作坊使在劔外軍民甚畏愛之入拜西上閣門使領昭州  
刺史知瀘與陝州悉心撫治頗著政績卒年七十三懷德素遊  
寇準門下歷官以強幹稱然酗酒多失真宗常面戒之

梁鼎字凝正華陽人祖鉞任蜀為劔門關使父文獻乘氏令鼎  
登太平興國進士解褐大理評事知秣歸縣遷著作佐郎端拱  
初獻聖德徽號頌試文遷殿中丞通判歙州以能聞詔嘉獎徙  
知吉州豪猾為患鼎暴其凶狀黥杖遠徙太宗賞其強幹代還

特賜緋衣犀帶寵之仍記名於御屏淳化中上書言今之知州  
卽古之刺史本朝考課承五代之後祇拘州縣之例徇名黜陟  
其有治狀顯著不加尤異或方略茂聞亦復任用大失勸懲之  
理寢成苟且之風是故水旱薦臻獄訟填溢今欲致治太平宜  
詔有司申明考績之法務責實效庶幾官得其人民受其賜矣  
歷三司度支判官至道初與陳堯叟建議興三白渠及陳許鄧  
穎蔡宿亳數州水利墾田事具食貨志遷都官員外郎江南轉  
運副使就改起居舍人徙陝西坐討李繼遷還奏軍儲失期削  
三任連知徐密二州真宗復舊官咸平四年遷兵部員外郎知  
制誥賜金紫時三司督逋限嚴有久被留繫者命鼎與薛映按  
籍詳定多所蠲免踰月拜右諫議大夫領度支使建議西鄙未  
寧應令陝西所在官鬻解鹽詔從之卽除制置使移文禁止商



人約束乖當又奏運咸陽倉粟實邊會粟已陳腐鼎又請以粟與民俟秋收易新粟言者病其煩擾命林特乘傳與張詠同議可否鼎坐改作非是罷守本官景德初內艱起復知三班院通進銀臺封駁司出知鳳翔以居憂哭泣傷目求判西京留司御史臺卒年五十二賜二子申甫吉甫出身鼎偉姿貌磊落尚氣有介節居官峻厲好學工篆籀八分嘗著隱書三卷史論二十篇學古詩五十篇

楊覃字申錫震之後曾祖承休昭宗朝以兵部員外郎使吳越阻於楊行密因留錢塘祖巖爲鎮海軍節度副使領春州刺史父郁早卒覃初名蟬少獻書錢俶授著作佐郎歸朝爲禹城尉登太平興國進士授徐州觀察推官擢知戎州遷太常博士使陝西蠲逋負淳化中轉屯田員外郎同判壽州潘慎修上其政

績詔嘉獎就命知州事丁內艱州民列狀乞留詔奪情永興節度田重進選覃與林特同判軍府事賜緋魚仍賜御書曆給以實俸重進不法事多抗執表求徙任不許就轉都官員外郎時討李繼遷調發芻糧務以促辦爲期人情怨嗟改職方員外遷屯田郎中三門發運使呂蒙正薦其材入判三司磨勘憑山理欠司咸平四年春早上言古之用刑皆避三統之月漢舊章斷獄盡三冬之月唐太宗凡斷重刑日勅減膳徹樂今春陽方盛時雨尚愆輦轂之下獄繫甚繁望詔有司死罪未得論決俟時雨降乃復常典仍望自今凡決重刑依唐故事以彰至仁之德嘗獻時務策五篇曰禦戎用兵爲政選賢刑罰文多不載明年同知貢舉出爲陝西轉運使賜金紫言繼遷雖死其子尚在且伐喪非禮請詔邊臣謹守斥堠毋得輕舉俟其衆叛親離則亡



無日矣與副使朱台符不協徙知隨州移唐州景德二年召還屬河北兵革之後命詣澶濱棣德博等州巡撫振給之俄知潭州王師討宜賊軍須多出長沙曹利用以聞詔書褒勞加刑部郎中祥符二年任淮南江浙荆湖制置發運使改太常少卿直昭文館知廣州勤於吏事所至以幹濟稱且著廉名俄加右諫議大夫卒年五十四長子文友奉禮郎次子敏楊州司士參軍從弟蛻及從子侃傳並進士第蛻官司封員外郎侃後避諱名大雅字子正素好學日誦萬言雖飲食不釋卷歷新息鄢陵二縣簿改光祿寺丞知新昌徙知潯州監在京商稅遷秘書丞咸平中交趾獻犀牛因奏賦名試遷太常博士又獻所爲文直集賢院出知筠袁二州歷官右諫議大夫集賢院學士知亳州卒侃樸學自信無所阿附天禧中使淮南遇風覆舟冠服盡喪

時丁謂鎮金陵遺以衣不受深恨之王欽若亦不悅在集賢二十五年不遷出其後者往往致位榮顯或笑其違世嘆曰吾不學乎今之世人而學乎古之聖人以故至此吾之所有不敢以薦於人而自獻于天子嘗因轉對上原治十七篇所著有大隱集西垣集職林兩漢博聞傳于世

馬元方字景山濮州鄆城人父應圖嘗知頓丘太宗攻幽州部芻糧沒敵中元方行求父屍不得訴於朝上哀之特爲官其兄元吉元方登淳化進士爲韋城縣簿改大理評事知萬年縣諸將討李繼遷關輔轉餉踰瀚海多死亡獨元方所部全十九以勞遷寺丞爲御史臺推勘官遷殿中丞陳恕奏爲判官言方春民貧請預貸庫錢至夏秋令以絹輸官行之出知徐州改太常博士梓州路轉運使後知郾州以酒過降知宿州徙滑州爲京



西轉運使知應天累遷太常少卿右諫議大夫權三司使王旦以為盡心官職然性下急又不納僚屬議論歲餘以煩苛罷進給事中權知開封改并州官至兵部侍郎卒

凌策字子奇涇縣人幼孤厲志好學渡江從姚鉉於廬州登雍熙進士夢人以六印加劔上遺之初調廣安軍判官改西川節度推官以彊幹聞淳化三年就加光祿寺丞代還拜左贊善大夫通判定州賜朱衣錦章御書會討李順策自陳舊諳民俗命知蜀州巴西當餉餼孔道徙綿州加太常博士還朝為廣南西路轉運使進屯田員外郎戶部判官請由陸路運嶺南香藥至南安汎舟而北大省轉送之費改職方員外郎直史館賜金紫又由英州大源洞伐山開道直抵曲江人以為便代還知青州東封以供億勤勞超拜都官郎中判三司勾院出知揚州屬歲

儉盜起兼淮南東路安撫使進秩司封王旦言其蒞事和平可寄方面值洪州水選為江南轉運使饒州產金縱民販市官責其算人甚利之名拜右諫議大夫集賢殿學士知益州累六任蜀策克勤吏職處事精審所至有治迹代還知通進銀臺封駁司糾察在京刑獄真宗稱其敏而能斷拜給事中權御史中丞時茶法甚敝詔與學士李迪御史呂夷簡同議經制稍寬其舊有疾遣醫存問遷工部侍郎致仕卒年六十二錄其子將作監簿璫璣並為奉禮郎兄簡官國子博士分司南京

宋搏字鵬舉掖人治毛詩登第補遂寧尉歷維州司理參軍改白虎令膳部員外郎薦遷右贊善次天利豐監徒知滕州改殿中丞通判洪州復薦召還改監藏庫遷國子博士通判西京留守司賜對便坐徙江南轉運使就遷度支員外郎真宗改



司封員外爲河東轉運使奏大通監冶鐵盈積可備諸州軍數十年鼓鑄願權罷採以紓民力又請科諸州丁壯爲兵以增戎備在任凡十一年兩至夏州界部發居民數詣闕奏事稱旨河東接西北境邊疆未靖屯師甚廣藉博經制漕運以幹治稱屢詔褒飭就加祠部郎中賜金紫景德四年判三司勾院爲戶部副使復善其職祥符初進刑部郎使契丹卒年六十六賜其孫出身子可法至太子中舍舜元登進士自筠州判官爲著作佐郎

鄭向字公明陳留人登進士爲大理評事通判蔡州累遷屯田員外郎知濠蔡二州名試集賢院除三司戶部判官修起居注遷度支員外鹽鐵判官出爲兩浙運副疏潤州蒜山漕河抵于江人以爲便擢知制誥同勾當三班院使契丹再遷兵部郎中

提點諸司庫務以龍圖閣直學士知杭州卒五代亂亡史冊多漏向著開皇紀三十卷撫拾遺事頗有所補

趙賀字餘慶封丘人舉毛詩登第補臨朐縣簿有幹才爲歲準所知淳化中調丁壯塞澶州決河衆多逸去獨賀全所部而歸父老張樂迎賀準使由譙門過以旌其能改大理評事鹽池吏欺緝錢選賀往鈎校悉得其奸真宗幸澶淵遣使八人省州縣賀以太子中舍安撫京東改殿中丞歷明宿二州通判徙知漢州爲政精明吏不敢欺名權三司戶部度支判官出爲京東西兩路運副益州路轉運使尋糾察在京刑獄遷工部郎中提舉諸司庫務爲江淮制置發運使軍將分部漕船舊主于吏受賄不平富者或數得饒郡因商販規利貧者至不能堪賀乃籍諸州物產厚薄分劇易爲三等視其功過率自裁定吏不得施其



姦歲漕米溢常數一百七十萬蘇州太湖塘岸壞前海支渠多  
廢水侵民田詔賀與兩浙運使徐奭兼領其事伐石築堤浚積  
潦自吳江東赴海流民歸者二萬六千戶遷給事中判宗正寺  
知壽州卒賀事繼母至孝以嘗得運使李中庸薦改官後中庸  
沒無子賀為主葬圖其象祀于家子宗道終集賢校理  
李垂字舜工聊城人咸平中登第調湖州錄事參軍上兵制將  
制書名爲崇文校勘遷著作郎館閣校理又上導河形勝書三  
卷欲復九河故道累修起居注執政丁謂惡不往謁罷知亳州  
遷潁晉絳三州明道中還朝閤門李康伯稱之曰君文學議論  
當爲知制誥但宰相未相識盍往見之垂曰我昔謁丁崖州則  
乾興初已爲學士矣今老大焉能看人眉睫冀推挽乎道之不  
行命也執政以爲傲復出知均州卒年六十九一五子仲昌最

知名銳于進取嘗獻計修六塔河無功自殿中丞責英州文學  
參軍

陳知微字希顏高郵人咸平五年進士解褐將作監丞通判歙  
州擢著作佐郎直史館俄充三司戶部判官使契丹遷大常博  
士判三司都磨勘司出爲京東轉運副使奏還東平監所侵民  
田六百八十家又決古廣濟河通運路罷夾黃河歲減夫役數  
萬計遷右司諫徙荆湖南路轉運使名拜比部員外郎知制誥  
淮南饑遣巡撫所至按視儲糧察諸官吏能否使還判吏部銓  
兼刑部又判司農寺糾察在京刑獄爲玉清昭應宮判官卒年  
五十平生詞藻雖無奇采而平雅適用思亦敏速儀狀甚偉所  
厚有材幹不務覲察時人許其能處劇有集三十卷子舜卿奉  
禮郎堯卿祥符五年進士



李防字智周內黃人登進士爲莫州軍事推官括磁相二州逃  
戶田增租賦十餘萬因請均定田稅凡縣有破逃五十戶者令  
佐降下考百戶殿三選二百戶停所居官能招攜者旌賞之改  
著作佐郎通判潞州遷秘書丞體量兩浙民饑建言逃戶田宜  
卽名入耕種使人不敢輕去叨畝而官賦常在京師請置折中  
倉聽人入粟償以江浙荆湖物權開封推官請與判官間三五  
日卽府司軍巡院察冤獄出爲陝路運副以城卒代沿江水通  
歲省民丁加意農作陞梓州路轉運使入爲工部員外郎三司  
戶部判官景德初江南旱防與張知白並爲安撫使言秦義增  
江淮兩浙荆湖權酷錢民頗煩擾詔止之移江南轉運言制司  
官鬻淮鹽役使兵夫輦載民以爲病且多漂失之懇請一切報  
罷而仍令商人入錢帛芻糧給以鹽斤公私皆利後多采用其

言徙知應天鑿府西障口爲斗門澳泝水民甚利之徙興元復  
除判三司鹽鐵坐失舉免官後起通判河南累遷給事中知延  
并耀潞四州卒生平精力過人多識鑿好建明利害所至必有  
論奏朝廷頗施行之在江南識晏殊於童子命賦詩薦用皆由  
此

梅詢字昌言宣城人少好學有辭辨登進士判利豐監遷著作  
佐郎御史臺推勘官預考進士於崇政殿真宗奇其占對詳敏  
名試中書除直集賢院會討李繼遷請以朔方授潘羅支使自  
攻取遣行未至而靈州陷還爲三司戶部判官屢上書請遣大  
臣臨邊募遊手擊賊論曹瑋馬矩節可用傳潛楊瓊當誅田紹  
斌王榮可責其效以贖過凡數十事其言甚壯後屢坐事降通  
判杭襄二州知蘇濠鄂三州徙兩江運副判三司開拆司湖北



陝西轉運使坐薦朱能貶懷州團練副使徙池州嘗夢人告曰  
通判呂夷簡必爲丞相詢待之甚厚果得其力起知廣德軍累  
遷翰林侍讀學士羣牧使至給事中知密官院仁宗御邇英閣  
覽歷代戶口登耗之數顧謂侍臣今天下民籍幾何詢對曰前  
代帝王恭儉有節則戶口充羨賦斂無藝則版圖衰滅炳然在  
目自五代之季生齒彫耗我太祖受命太宗真宗休養百姓天  
下戶口之數蓋倍前矣因詔三司及編修院檢閱以聞爲人性  
儉薄兼以下急好進侈於奉養至老不衰久乃出知許州卒  
陳貫字仲通相州人徙河陽少倜儻以布衣論邊事言朝廷寬  
傳潛張昭允之誅故復致楊瓊王榮喪師請自今凡遇合戰奔  
歸主校皆斬大將死裨校無傷與奔軍同軍衄城圍別部救不  
至以逗留論真宗識其名舉進士擢真高第調臨安縣簿召爲

著作佐郎歷知衛涇二州督察盜賊禁戢無賴簿書筦庫賦租  
出入皆自檢覈嘗語僚屬視官物如已物州憚其嚴擢利路轉  
運使歲饑出職田以賑計富民口悉發其餘徙陝西累遷河北  
轉運使請疏徐鮑曹易四水興屯田徙河東歷三司戶部鹽鐵  
副使刑部郎中直昭文館知相州還朝卒嘗著兵略上形勢選  
將練兵論三篇大略言地有六害今北邊旣失古北之險自威  
武城東距海三百里沮澤磽确所謂天設地造非敵所能徑入  
由威武西極狼山不百里地廣平利馳突此必爭之地凡爭地  
之利先居則佚後起則勞宜有以待之又言昔李漢超守瀛州  
契丹不敢視關南尺寸地今之將帥大抵用恩澤進與國初不  
同故敵勢益張外兵不振幾二十年至於禁旅但賴廩給賜予  
恬于休息目不識攻戰可以衛京師不可以戍邊境請募上人



隸本軍籍丁民爲府兵使北捍契丹西捍夏人敵之情僞地之險易彼皆素知可不戰而屈人之兵矣世頗稱之子安石字子堅以蔭及第嘉祐中爲夔陝運判民蓄蠱毒輒捕誅又圖示以解毒藥方患日衰息擢提點陝西刑獄攝帥鄜延諜聞敵動靜敕邊民備禦寇至無所獲而去璽書嘉獎歷使京西河東淮南京東不肯保李定持服士論多之遷戶部副使集賢殿修撰河東都轉運使佐韓絳行鹽法謂興事常有漸急則反擾令出鹽券付民使隨所貿易鬻畢而歸券私販爲減進天章閣待制王中正帥東師駐白草平命持四十日糧彌月未至發民再餉李舜舉劾其專詔會逮俄而他路餽糧多不繼神宗察其無罪赦之名爲戶部侍郎進吏部選人久次將改京官臨當引對往往沮以微文一跌不復安石特爲奏免以絕宿弊遂爲後法出

知河陽軍至龍圖閣直學士卒年八十一

狄棐字輔之長沙人仁傑十四世孫少以文謁路振深器愛妻之以女登進士調大理評事知分宜縣轉開封司錄改知壁州與寇準厚薦通判益州累太常少卿知廣州加直昭文館代還人稱其廉拜右諫議大夫龍圖閣直學士權判吏部流內銓出知滑州進給事中徙天雄軍會給郊賞帛士卒譁謀降知隨州進樞密直學士歷知陝鄭二州河中河南二府復判流內銓卒其爲政愷悌不爲表襮死之日家無餘貲子遵度字元規少穎悟篤志於學每讀書意有所得卽仰屋瞪視人呼之若弗聞以蔭任襄縣主簿不久棄去好爲古文著春秋雜說多所發明嘗患時學靡放作擬皇太子冊文裴晉公傳人多稱之尤嗜杜詩一夕夢甫爲誦世所未見詩及覺纔記十餘字因足成之



爲佳城篇官至侍御史卒有集十二卷

郎簡字叔廉臨安人幼孤貧從學四明朱頔長學文沈天錫登進士試校書郎知寧國縣徙福清有石塘陂歲久湮塞募民浚築溉廢田百餘頃邑人爲立祠訓隨州推官真宗引對除著作佐郎知分宜徙竇州有縣吏死子幼贅壻冒其貲子長屢訴不得直簡爲直之又徙藤縣興學養士俗爲一變始有舉者歷通判海州提點利州路刑獄度支員外郎廣南東路轉運兼知廣州擢秘書少監捕斬賊馮佐臣入判大理寺刑部出知江寧歷右諫議大夫給事中以工部侍郎致仕卒年八十九簡性和易平居宴語惟以宣上德救民患爲意尤喜賓客卽錢塘城北治園廬自號武林居士導引服餌晚歲顏如丹尤好醫術遇人有疾多處方療之有集驗方行于世知杭州孫沔榜其里門曰德

壽子累從父之官頗無廉稱後終都官員外郎

張若谷字德繇劍州沙縣人登進士調巴州軍事推官遇蜀寇掠隣境若谷率衆守禦賊引去更全州真宗名見改大理寺丞知濛陽擢廣寧鑄錢監歲餘所贏三十萬緡擢知處州歷江湖淮南益州轉運江淮制置發運使入爲三司度支鹽鐵副使累遷右諫議大夫知并州朝廷欲通敵情歲以繪錦令麟府市蕃部馬廢罷已久若谷奏復之馬歲增入邊戎兩利改提舉諸司庫務權判大理寺進樞密直學士歷知澶與揚州成德軍江寧府入知審官院通進銀臺司糾察在京刑獄移應天府改龍圖閣學士徙杭州歲饑斥廩設糜以賑權判吏部流內銓復知洪州所至有循良跡不矯激取名宰相張士遜引拔累官尚書左丞卒



陳大素字仲華河南緱氏人家行修治登進士由大理評斷累  
至少卿號稱明習歷官二十餘年遇朝廷大疑獄必召大素預  
議太素爲推原人情傳以法意據文直斷不求曲當衆皆釋然  
以爲不及或所論有不中臨案每忘寢食雖寒暑不變子弟有  
止之者答曰囹圄之苦豈勝案牘之勞哉以耳疾求罷上多其  
任職弗許累遷兵部郎中歷知江陰軍充明二州皆著政績卒  
同時有馬尋者須城人舉毛詩學究判大理寺稱明習法律  
有饑民羣入富家掠困粟尋奏其情與強盜異得減死論著爲  
例歷提點兩浙陝西刑獄廣東淮南兩浙轉運知湖撫汝襄洪  
宣鄧滑八州終司農卿 又有杜曾者濮州人爲吏號知法嘗  
言殺人者死傷人者刑先王不易之典律謀殺已傷則絞蓋甚  
其處心積慮陰致賊害爾至於故殺初無意必須已死乃有殺

名苟無殺名而用死法則與謀殺孰辨國朝因唐大中制凡已  
傷未死已死更生皆論如已殺自此不知殺幾何人矣請格弗  
用其有近世赦令殺人已傷未死者皆得原減亦非律意請傷  
者從律保辜法限內死者論如已殺勿赦皆著爲令

張傅字巖卿唐功臣公謹後裔祖播在亳州團練副使徙居于  
譙傅及第遷著作佐郎知奉符縣方修宮觀以辦事稱向敏中  
薦知楚州歲饑發上供賑貸活以萬計上章待罪詔獎之遷江  
西江東提點刑獄入權三司鹽鐵判官會河決濟北民多被害  
命安撫京東歷陞三司度支副使請外遷太常少卿知應天除  
右諫議大夫徙青州遷給事中知鄆州後知應天以工部侍郎  
致仕卒傅強力治事七爲監司所至審覈簿書勾擿奸隱州縣  
憚之嘗言吾所以事事致察者正以愛州縣也吏不敢慢則不



復犯法矣。天禧中有術士出入禁中，嘗游秦悼王家，自言年數百歲，歷唐肅代朝，傳一見訊以末事，惘然語屈人服其智。崔立字本之，開封鄆陵人，祖周度，仕周爲泰寧軍節度判官，慕容彥超叛，責以大義，見殺。立登進士，爲果州團練，推官役兵輦官物，因道險，率衆錢備舟，載還。真宗記之，改大理寺丞，知安豐軍。大水壞期斯塘，躬督繕治，進殿中丞，歷通判廣許二州，提舉滑州決河，調民出芻，楛計其用有餘而下戶未輸者尚二百萬。悉奏弛之，權知江陰軍，屬縣港堰久廢，教民濬治，溉田數千頃。開橫河六十里，疏通漕運，遷太常少卿，歷知棣、漢、相、潞、兗、鄆、涇七州。兗歲大饑，募富人出穀振餓者，全活甚衆。立天性淳謹，兼有識見，能知人。韓琦尚爲布衣，以女妻之，亦喜論事，尤不肯言符瑞祥符間，前後凡上四十餘事。言徐州大水，江淮連旱，無爲

州烈風，金陵火，此皆天所以警驕僥，戒淫佚也。時論避之，以右諫議大夫知耀州，改知濠州，遷給事中，進工部侍郎，致仕卒。張逸字大隱，鄭州滎陽人，及第爲校書郎，知鄧城，有能名。知州謝泌將薦之，先設几案，置章其上，望闕再拜曰：老臣爲朝廷得一良吏，他日引對，真宗問欲何官，對曰：母老在家，願得近鄉一幕職歸奉甘旨足矣。授澶州觀察，推官母喪服除，帝雅賢泌，引對又問改大理寺丞，知長水縣，留守王嗣宗厚遇之，徙青神，貧不能行，嗣宗假俸半年，使辦裝。旣至，興學校，教生徒。邑人陳希亮，揚異相，繼登科，逸改其居曰桂枝里。縣東南有松柏灘，夏秋暴漲，多覆舟，逸禱于江神，不踰月爲徙五里，時人異之。再遷太常博士，知尉氏縣，擢監察御史，提點益州路刑獄，使契丹，還歷兩浙，移河東、陝西三路轉運使，以龍圖閣待制知梓州，進兵部



郎中知開封有僧求內降給田逸不許仁宗以爲能守法禁中  
稍通女謁逸請令官司糾劾從之無何又以樞密直學士知益  
州至是凡四至其民風熟諳人不敢欺華陽有騶長殺人誣道  
旁行者縣吏受財繫誣者反令殺人者守囚囚不敢言逸一見  
卽曰囚色有冤吾見守者氣不直得非枉乎囚叩首決訊果服  
蜀民驚以爲神會歲旱留意堰務壅江儲水以溉民田民大饑  
禁殺耕牛決配犯者雖遭屢歎不致爲害民思念之未幾卒于  
官

張旨字仲微河內人父延嘉讀書不仕州上其行賜號嵩山處  
士旨以保定司法叅軍上書運使鍾離瑾願補縣尉捕賊自効  
瑾奏徙安平尉捕盜三百餘人嘗與賊鬪流矢中臂猶手殺數  
人擢試校書郎知遂城縣遷著作佐郎明道中淮南饑詣宰相

陳救荒之策命知安豐縣募富民出粟以給餓者浚泝河三十  
里疏泄支流注芍陂爲斗門溉田數萬頃外築堤以備水患再  
遷太常博士知尉氏縣徙通判忻州元昊反遷屯田員外郎通  
判府州州舊依山爲險無外城旨固請創築未就寇遽至乃聯  
巨木補其罅守以強弩中外不相聞者累月人心震恐旨矯詔  
出庫中雜綵數千匹賜衆城卒皆東望呼萬歲賊疑以爲救至  
會賊先斷汲路至夜開門令官軍壁兩傍護民出汲賊不敢近  
又督居民乘城力戰賊死傷者衆方解去以功遷都官員外郎  
徙知萊州葉清臣舉旨材堪將帥召對改知邢州擢提點河東  
路刑獄范仲淹歐陽修復言其鷲武有謀除閣門使累遷光祿  
卿知潞晉二州以老疾權判西京御史臺卒

鍾離瑾字公瑜合肥人登進士爲簡州推官以殿中丞通判益



州擢開封推官出提點兩浙刑獄徙淮南運副歷京西河東河  
北轉運使改江淮制置發運使置歸揚州召伯埭旁人以爲利  
因奏計多致東南物以賂權貴御史臺請劾狀帝面諭亟還所  
部累遷刑部郎中三司戶部副使除龍圖閣待制至直學士知  
開封府卒

張洞字仲通祥符人太常少卿惟簡之子軀幹長大眉目如畫  
自幼開悟卓犖不羣日者異之謂當以政學顯日誦千言爲文  
甚敏未冠睥然有聲遇事慷慨自許以布衣上討元昊方略召  
試舍人院擢將作監簿復登進士調連水判官親喪改潁州推  
官民劉甲主使弟柳毆婦死吏當夫法洞以律分首從旣非夫  
本意當坐主使遂出其夫朝議從之由是知名晏殊知永興奏  
洞管勾機宜文字改大理丞知鞏縣留守西京復奏爲司錄深

敬之殊晚節用刑頗驟洞自以不負所知輒爲諫止高若訥吳  
育薦充秘閣校理知太常禮院會宰相陳執中死謚榮靈其孫  
訴之洞奏生不能正其法死猶當正其名聞者避之劉敞議郭  
后耐廟謂春秋之法不二嫡當許其號不許其禮洞奏后嘗母  
儀天下無大過與哀姜之惡不同敞議非是轉太常博士判登  
聞鼓院在館閣久數有建明仁宗方嚮儒術以洞爲知經賜飛  
白善經二字洞獻詩爲謝復詔獎轉祠部員外郎出知棣州會  
河決甫退強弱冒占不均官爲標給蠲其租以綏新集上奏河  
北東路民富蠶桑契丹號爲綾絹州朝廷以內地不復置慮滄  
景當孔道兵守多缺契丹時以販鹽爲名往來境上不可不察  
願度形勢置帥增戍以控扼之復與歐陽修極論天下久安縉  
紳崇尚虛名類以寬厚沉默取名遇事無所補益非朝廷福又



言諫官既重其任。不數年輒至顯位。自今當緩其遷。使端良之士不亟易。而浮躁者不妄進。名權開封推官英宗轉度支員外郎。上方在疚。或經旬不御正殿。疏言陛下春秋鼎盛。豈宜自比冲幼之主。當躬萬幾。攬以稱先帝付畀之意。厭元元之望。命試開封舉子賦題。孝慈則忠。上意其譏諷。韓琦爲之解。又論唐宗室多賢。宰相蓋知學問。使然國家本支蕃衍。無親疏一切厚廩。不使知辛苦。婢妾聲伎無多寡之限。至滅禮義。極嗜欲。若今祈國公宗說。恃近屬驕貴。不道貸之則亂法。刑之則傷恩。宜因品秩立制度。更選老成教授之。轉司封員外。權三司度支判官。大臣忌之。出爲江西轉運使。值荐饑。奏免徵民積歲逋賦。民輸油絹不中度者。命計尺寸論錢。民便之。移淮南轉工部郎中。

卒年四十九

弘簡錄卷一百六十二 終



